

# MYANDÀ YÀ MIKÙKÙKÙ

## MITÒÒKESHA KÙDÌ CIPRÒFETÀ



Twinyikààyaaku mitù yètù mpindyewu bwà disambila. Mukalenge Nzambi wetù, Mufùki munène wa Maulu ne buloba, Wákabìisha cyàkàbìdì Yesù ku bafwè awu, ne mwikàle ne mwoyi neetù munda mwà bidimu binunu bìbìdì ebi, mwikale ne mwoyi kashidi bwà kushindika Dìyì Dyendè ne kuDivwija dilelèlè kùdì lukòngo ne lukòngo lwónsò. Tudi ne kusàkidila kwàbùngì bwà Bwikadi Bwèndè bwà Buzambì mpindyewu mene, bamanyè nùnkù ne, tudi ne ditwishiibwa dinène edi, dyà ne paanyimà pàà mwoyi ewu mumanè kujika, tudi ne Mwoyi wà Cyendèlèlèlè mu buloba bùcilwalwà. Tudi tuKusàkidila, bwà cyòci eci, Mukalenge. Ne ditèkemena adi, lwongò lwà musùukà, lùdì lushimàte ne lutwishiibwe mu cikondo cyà cipeepèlè cikalè cyà mvùla. Nènku pàdì bipeepèlè bikolè byà mvùla bilwa, mavwala manène ènda àbùnguluka, tudi tuumvwa ne ku diitabuuja mu Yèyè tudi mwà kubànda ku lusongo lwà divwala ne divwala dyónsò.

<sup>2</sup> Nzambi, tükwàcishèku dilòòlò edi patùdì tulwa bwà kukwàcila babèèdì ne bàdì mu lukèngelu mudimu apa. Tudi tulòmba, Nzambi, bwà nè kakwikadikù mubèèdì munkacì mwètù patùdì tuumuka dilòòlò edi to. Swàkù bwà muntu ne muntu wòndopiibwe ku Bukolè Bwèbè bwà Buzambì, bònsò bàdì apa ne mu ditùnga dijimà, ku nshinga, swàkù bwà kakwikadikù muntu ne butekète nànsha umwe ùpàtuka mu nzùbu kanà yònsò anyi dikùngwila kampànda dilòòlò edi to. Swàkù bwà Nyumà Webè àbòndòpè. Lekèlàku bwà Dìbà dinène dyà bwakàne, ne lwondapu mu mapwàpwà Àdì, dibandè, ditumè nsèsà yà diitabuuja mu mwoyi wónsò pàdìbo bàtèeleja Dìyì apu, bàmona mamwèneshiibwa à Nyumà Mwimpè àbàtwisha ne Yèyè ùcìdì ànu ne mwoyi. Tudi tulòmba mabèneshà aa, Taatù, mu Dìna dyà Yesù. Amen.

Nudi mwà kusòmbaayi.

<sup>3</sup> Ncyà bushùwà ne tudi tubala eci bu dyèsè dinène dyà kwikala kaaba aka dilòòlò edi, kàbìdì, bwà—bwà kwakula ne bantu ne kusambidila babèèdì. Tudi baswe kwela mwoyi bònsò bàdì pambèlù mu ditùnga ku—ku nshinga yà tèlèfonè mu ditùnga dijimà, cyàkàbìdì dilòòlò edi. Ne pa nànkù tudi tulòmba bwà Nzambi àbèneshèku muntu ne muntu wa kunùdì, mutwishiibwe ne bònsò bìtàbì Kilistò mu dindà emu abu nebùùjiibwè ne Nyumà Mwimpè ne nebùikalè ne nsòmbelu wa lulamatu ne mulelèlè kùdìYe too ne pààjika mwoyi pa buloba apa, mwoyi

wà cifwàkà ewu. Ne pashùishe bòbò, mu kwenza kwà nàнку, bàdi ne Mwoyi wà Cyendèlèèlè. Kabàadyàkufwàku mu cikondo cìcilwalwà to, too ne ku Cikondo cinènè citùdi twètù bònsò bindìle ne mwoyi mujimà kumpàla eku aci.

<sup>4</sup> Mpindyewu netwàmbè, pàncìdi ngèèla meeji ku bwalu ebu apa, kî mbwà kwimanyika to. Mwanèètù Vayle ùdi kaaba aka, ne ndi mufwànyine kupanga kumumòna. Nè. . . Ndi mwà kukutùmina mifundu yà ku cianza ayi pangàfùmà ku Tucson anyi? Ndi munkaci mwà kuyikenketa yònsò, ncyènà mwànji kuyibala yònsò to, nènku nènkwàlùjilèyi pàndi ànu mfika ku Tucson.

<sup>5</sup> Mpindyewu ndi muswè kufila dimanyisha. Eci cidi nangàngà bwà maèkèleeziyà myaba yònsò, nangàngà mu Wesète, anyi mwaba kanà wònsò yidi miswè kulwa ayi. Mwanèètù wa balùme wa ngiikàdilù milenga ewu, Mwanèètù Pearry Green, ne. . . Yèyè's ke muntu udi mukèbe dilamakana dyà ku tèlefonè edi kaaba aka. Mukalenge ùvwa munkaci mwà kumutèèkaci pa mwoyi wèndè bwà kulwa kutwèndela ku Tucson, ne kutwàdija ditàbuluja ku Tucson, citùdi tükèngelà menemene. Nènku Mwanèètù Pearry neikalè mu Tucson. Wèwè muswè kupetangana nendè, petàngàna ànu ne birò byètù kuntwaku. Necìikalè mu matùkù 10, 11, 12 ne 13 à ngondo wa cimungu wa mashikà. Yèyè ke uvwa ne bwalu abu ku mwoyi wèndè kùkaadi ntàntà mule, kàdi ngàkamwambila ne kùdi "mùshindù ànu ùmwèpelè wà wèwè kucyùmusha ku mwoyi, nkuya kacyènza." Nè yèyè mmwanèètù mwena Kilistò, musadidi mulelèlè wa Nzambi. Nènku nwènù bantu, bàdi mu Tucson mwàmwa, ndi mumanyè ne nenwikalè babènèshìibwe pàdiye wènzà mudimu wà bwambi mwaba kampànda kuntwaku, pàmwàpa ku Ramada Inn kwàka anyi mwaba kanà wònsò udi Mukalenge ùlongolola kaaba kampànda, yèyè kèna naakù muneemu emu to. Kàdi ndi mumanyè ne nenwikalè babènèshìibwe ku dilwa, kutèèleja Mwanèètù Green pàdiye ùtwàdijila Dìyì dyà Nzambi apu, pàmwàpa kusambidila kwà babèèdi, anyi ní ncinyi cyònsò cidi cisanganyiiwbà mu mudimu wa dilaabiibwa dyà Nzambi bwà kwenza aci.

<sup>6</sup> Tudi kàbìdi baswè kusàkidila Mwanèètù Orman Neville, Mwanèètù Mann, bwà cikondo cilenga cyà bwobùmwe naabò eci. Mùshindù mwinè wùndi ne kusàkidila kwàbùngì bwà kwikala ne, kwikala muswikàkàne ne muntu bu Mwanèètù Neville, Mwanèètù Mann, ne bambi bakwàbò bònsò bàà mu nyùngulukilu emu aba. Ngèèla meeji ne mbamanyishe diikalanganakù dyàbù. Bòbò kabàyi babàleeje, kùdi kasumbù kàà balombodi ne kùdi èkèleeziyà wetù ewu to, ndi mutwishìibwe ne Nzambi mmunumanye mwab'ewu bu basadidi Bèndè. Mukalenge ànùbènèshèku kashidi.

<sup>7</sup> Mpindyewu, bàvwa bankonkè cintu kampànda cikesè mwab'ewu, pa kabèji kakesè kàvwàbò bampèeshe, bwà. . .

Bàvwa ne cisangilu cyà balubuludi dilòòlò adi mwaba ewu, ku kasumbù kàà balubuludi ne balami, nènku ndi ngèèla meeji ne lwàpolù lùvwa lubala mu dindà emu kumpàlà kwà èkèleeziyà. Ciinè aci, citu ciibidilu cyètù bwà kwenza nàнку. Mu mapàngadika àvwà mangàciibwe kùdì kasumbù kàà balubuludi ne balami mu èkèleeziyà emu, mu bushùwà bwà bwalu, kabyèna mwà kusànkisha muntu ne muntu to. Katwèna mwà kwenza aci to. Ncyèna ne cintu nànsha cimwè cyà dyenza ne kasumbù kàà balubuludi anyi kasumbù kàà balami to. Ncyèna nànsha nè disungula dyà kwenza ànu kòkù kwikàle mèyi búngì búmwè, nènku ndi ne cyà kwikala mwab'ewu bwà kucyènta díbà adi, Mwanèètù Orman Neville ùdi wàngata disungula diibìdì adi. Pashùshe bikèngela twelè cyàla pa byòbì ebi, bwalu tudi citùpà cyà èkèleeziyà. Kàdì cìdì dipàngadika dyà kasumbù kàà balubuludi ne dìdì twòtù tusumbù atu twàngata adi, tudi bushùwà tubàtwa nyama ku mikòlò lukàmà pa lukàmà, bwalu ke cidibo balwile kaaba aka ncyòci aci. Ne mapàngadika àbò àdì pankaci pààbò ne Nzambì. Mémè ncyèna mwà, ncyèna mwà ne ncyèna muswè, mu mùshindù kanà wònsò, kukàndameena dipàngadika adi to. Nè cikwàbò cintu, mbankàndike kùdì Bukalenge bwà États-Unis bwà kwàngata dipàngadika kampànda pa bwalu abu, pa nàнку bu nwènù mwà kuswà kanùndòmbukù bwà kulongolola mapàngadika àbò to. Ncyèna mwà kucyènta to, ne ncyèna muswè kutèeleja kantu nànsha kàmwè pa bwalu abu to. Nwamònu anyi? Pa nàнку kanùndòmbukù bwà kulongolola mapàngadika àbò to. Nwènù mònanganàayi ne kasumbù aku, kòkò nkàvwà kangàte mapàngadika awu. Mbìmpè.

<sup>8</sup> Mpindyewu mu bwalu bwà disangisha dilwalwà, bìdì mwà kwenzeka, bu Mukalenge mwà kwanyisha, nèngàalukilè kaaba aka mu mbingu mitwè ku yinaayi anyi yisambòmbò, anyi cintu bu nàнку, pàmwàpa bwà disangisha dyà dyàlumingu dikwàbò. Nènku mwà mudyanjilè kumanyisha mu dindà emu ne mwva muswè kwakula pa *Nzambì Mumwènèshùbwe Mu Díyi Dyèndè*, nènku ncyàkwikala ànu ne díbà dilòòlò edi to, nènku, bwà kwamba menemene, ncyèna ne díyi dikumbàne bwà kucyènta to. Nènku díbà adi musumbà, kùdì pabwìpi ne bantu bíngyabíngyàlè pambèlu ànu mùdìbo munda emu, pàmwàpa bapite, patùdì tubadika bisè ne màshinyi à bisemuna ne bikwàbò bìdì bisòmbè pambèlu pààpa abi ne bantu. Bakàngule, kasanji kakesè bakàbàndishe ndambù, tudi mwà kucyùmvwa, kadyòmbà kakesè aka, kadyòmbà kàà kàya ntàntà kuùmukila mu tabernacle emu, tudi mwà kukàtèelejila too ne mu ntàntà wa kuùmukila apa too ne ku mùsèèsù ùdì ùlonda. Ne tùmwe twà ku tùshinyi tùdì mu ntàntà wa ndambu wa misèèsù, milongo yà tùshinyi, eku ne eku, tùnỳngùlùke ne mu misèèsù, mu nyùngulwilu wa tabernacle dilòòlò edi. Ncyèna ngiitabuuja ne mu musangu nànsha wùmwè, mùdìbi bìmwèka, kacya katùtukù bapetè bantu balamàkàne munda ne mu nyùngulwilu wa

èkèleeziyà kupita batùdi naabò dilòòlò edi nànsha. Pa nàнку tudi. . . Nènku bààbúngì, bààbúngì menemene, bàdi bàlwa, ne bàya.

<sup>9</sup> Pa nàнку bidi bileeja ne: “Mwaba udi Citàlù, ke wàdisangishilà mikanku.” Nènku swàyikù nnwàmbilè dilòòlò edi, mu kasùmbù kakesè kàà bantu aka ne, cìdi ndidisanga dyà buloba bujimà. Pabwìpi ne byàbisàtù bibìdi byà matùnga à nsangilu mmaleejìbwe kaaba aka, pa kuumusha matùnga àtaanu à ku baabèndè, nànsha mene too ne ku Russie, ne mu bitùpà bishiilèshìilàngàne byà ditùnga. Kupweka too nè mu Venezuela, kupàtuka kubwela mu Jamaïque, mu bitùpà byònsò byà ditùnga emu, bantu bàdi mwab’ewu, biikàle ne nzala ne nyòòtà yà Nzambi. Cikondo cilenga kaayìpu’s wè!

<sup>10</sup> Mpindyewu ndi muswè, kumpàlà kwà kubala Bible, ne nùnsambidilèku mpindyewu. Nè—nèngiikalè mwà kuteeta kutwàlakù kaaDiyiisha kakesè, bu Mukalenge mwà kwanyisha, bwà mudimu musungùlùke wà dyondopa dyà kùdi Nzambi. Bwalu, mu dindà emu tuvwa baakùle pa lupàndù. Nènku dilòòlò edi netwàkulè ndambù wa tusunsa pa dyondopa dyà kùdi Nzambi, ne pashìishe kubìikidisha mulongo wa babèèdi ne kusambidila bantu. Patùcìdi twenza cyòci eci apa, bàdi ku nshinga abu, kwònsò kunùdi nusanganyiibwa aku, nànsha mene mu bisè ne mu nyungulukilu amu, mu ntàntà mùsèèsù ùmwè anyi yìbìdi ne tabernacle; pàdi cikondo cyà kusambidila babèèdi cikumbana, panwikalà kanùyì mwà kubwela mu nzùbu to. . . Bwalu, kanwènà mwà kubwela to, ndi mutwishìilbwe mpindyewu, bwalu ku biibi myaba yònsò nkupàte patapata, nkupite, ne kakwènà mwaba nànsha penyi to, pa nàнку sambilaayi ne tentèkèlàngànaayi byanza muntu ne mukwèndè pambèlu apu. Nènku mwambi yònsò udi neetù ku nshinga dilòòlò edi awu, àsambidilè kàbìdi disangisha dyèndè pàdi masangisha à dyondopa aa munkacì mwà kwenzeka apa. Tudi twitabuuja ne Nzambi ùdi myaba yònsò, myaba yònsò. Mpindyewu kumpàlà kwà twètù kubala anyi. . .

<sup>11</sup> Kumpàlà kwà twètù—twètù kusambila, tudi baswè kubala ndambù wa Dìyì dyà Nzambi. Nènku ndi mushintùlùle Mifundu yànyi—yànyi kùkaadi katanci, bwalu ndi muswè kushintulula mùshindù wà disangisha dìmvwà mutèèke mu meeji àànyi bwà dilòòlò edi, ke bwà cinyi ndi mudishintùlùle kakesè ndambù; ne pa nàнку bivwa bikèngela bwà mèmè kushintulula Mifundù yànyi, ncayi nyishintulula to, kàdi nyitèeka mu bulondyanganyi bukwàbò, bwà dyondopa dyà kùdi Nzambi, bwà ne—bwà bantu bààmòna mwà kuumvwa.

Tùbuululàayi mu Luukà Munsantu, nshapità wa 24. Nènku netùbangilè ku mvensà wa 12 wa nshapità wa 24, ne netùbalè too ne ku 34. Bìdi pa dibìikà dyà ku lufù dyà Mukalenge Yesù.

*Pashìishe Peetèlò, Peetèlò wàkajuuka, ne*

*wàkanyeema lubilu mutàngile ku lukità; ne wàkiinama, ne wàkatàngila bilàmbà byà linà . . . wùdikonka munda mwèndè bwà cìvwà cìfùma ku dyanzeka.*

*Nènku, mònaayi ne, bàbìdì bàà kùdìbo bàvwa bàya ditùkù òmwèdìmwè adi ku musòkò ùvwàbo babùkila ne Emàwùsè, ùvwà mu ntàntà wa kilòmèètà dikumi nè yìbìdì.*

Mpindyewu, bìdì bikèngela stada dikumi bwà kwenza—bwà kwenza kilòmèètà umwe ne citùpà, pa nàнку cìvwa kilòmèètà mitwè ku dikumi.

*Nènku bu mùvwàbo bàyiikila pàmwè bwà . . . bintu bìvwà byenzèke ebi.*

*. . . byàkalwa kwenzeka, ne, pàvwàbo bènda bàyiikila pàmwè ne bènda bèlangana meeji, Yesù yèyè mwinè wàkaseemena pabwìpì, ne kuyayè naabò.*

*Kàdì mèsù àbò àvwa mapangisha bwà kabùkkadi ne cyà kumumanya to.*

*Ki yèyè kubàmbila ne: Mmuyiikì wà mùshindù kaayi ewu unùdì nwènù nuyiikilangana munkacì mwènù nùnkù, panùdì nwenda nuya, ne biikàle babungàme nùnkù?*

*Ne umwe wa kùdìbo, dìnà dyèndè Kelèòpà, wàkandamuna kumwambila ne: Wèwè udi ànu mwenyi mu Yèlusàlèrà, kàdì kùyi mumanyè bintu bìdì bifùma ku dyanzèka . . . ebi munda mwà matùkù aa anyi?*

*Ki yèyè kubàmbila ne: Bintu kaayi abi?*

Mpindyewu vùlukàayi ne, ewu n'Yesù Yèyè mwinè, mubiike ku lufù, ùyiikila.

*Ki kumwambilàbò ne: Pa bìdì bitàngilà Yesù wa mu Nazàlèètà, uvwa mupròfeta wa bukolè mu byenzedi ne mu dîyi kumpàlà kwà Nzambì ne bantu bònsò awu:*

*. . . mùvwà baakwidi banène ne bakòòkeshi bèètù bamufile kùdì . . . bwà kwikala—bwà kwikala mupùishùbwe ku lufù, ne bamupoopèle pa nkùrusè.*

*Kàdì tuvwa tutèkemena ne yèyè nguvwa ne cyà kwikala mupikùle Izàlèlèrà: ne pa kuumusha byònsò ebi, leelù ewu nditùkù dîsàtù dyà kacya bintu ebi byenzeka.*

*Èyowà, ne bakàji kampànda kàbìdì bàà mu musùmbà wètù mbatùkèmèshe, bàvwà ku lukità dìnà ne bwebwebwe;*

*Nènku pàvwàbo kabàyi basangàne mubidi wèndè, mbalwè, bàmba ne, bàvwa kàbìdì bamòne cikèènà-kumòna cyà banjèlò, bàvwà bàmba ne . . . yèyè uvwa ne mwoyi.*

*Ne bàmwè bàà ku aba bàvwà nèètù mbayè ku lukita aku, ne bakasangane ànu mùvwà bakàji bàmbè amu: kàdi yéyè kî mbamumòna to.*

*Tèèlejàayi mpindyewu; Yesù.*

*Pashùshe yéyè kubàmbila ne: Éyi bakùtàkàne, . . . bàà myoyi mineeme bujitu bwà kwitabuwa byònsò bìdi baprófetà bàmbè:*

*Kabìwaku bìkèngela bwà Kilistò kwikalayè mukèngè bwà bintu ebi, ne kubwela mu butùmbi bwèndè anyi?*

*Nè kubangila ku Mòsà ne baprófetà bònsò, wàkabùmwija byònsò, mu mifùndu yònsò bintu bìvwà bìmutàngila yéyè mwinè.*

*Nènku bàkaseemena pabwipi ne musòkò, ùvwàbo bàya: nènku yéyè kwenza bu uwu ukèba kuya ntàntà.*

*Kàdi bóbò bààkamwenzeja, bàmba ne: Shààla neetù, bwalu tukàadi dilòòlò, nè ditùkù dikaadi diyè bikolè. Nènku wàkabwela bwà kushààla naabò.*

*Ki kwenzekabi ne, pàvwàye musòmbè naabò ku mèèsà apu, yéyè kwangata dyàmpà, ne wàkadibènesha, ne wàkadibùla, ne wàkabàpèeshadi.*

*Nè mèsù àbò àkatàbala, nè bààkamumanya; ne yéyè wàkajìmina ku mèsù kwàbò.*

*Ki kwambilanganabò muntu ne mukwèndè ne: Myoyi yètù kayìwaku yilàkuka kapyà munda mwètù to, pàvwàye wàkula neetù mu njila apu, ne pààkatùbulwìlaye mifùndu apu anyi?*

*Ki kujuukabò pa díbà dímwèdímwè adi, nè kwalukilabò ku Yelusàlèma, ne kusanganabo bàà dikumi ne umwe abu basangile pàmwè, nènku cikondo cìvwàbo naabò aci,*

*Bàmba ne: Mukalenge mmubìike ku lufù cyà bushùwà, ne mmumwènekèle Simonà.*

*Nè kulondabò bintu bìvwà byenzèke mu njila, nè mùshindù wàkamumanyinàbo ku dicibula dyà dyàmpà.*

<sup>12</sup> Mpindyewu túsambilàayi. Taatù munanga wa ngàsà, tudi tuKusàkidila bwà Díyi Dyèbè, bwalu Díyi Dyèbè didi Bulelèlà, Díyi Dyèbè didi Mwoyi. Nènku Wèwè, Éyi Mukalenge, ne Díyi Dyèbè nudi Umwèpelè. Pa nàнку tudi tulòmba dilòòlò edi, Mukalenge, bwà Wèwè kulwa munkaci mwètù mu bukolè bwà dibìikà Dyèbè dyà ku lufù ne watùleeja dilòòlò edi, bu bàvwà bàfùmina ku Emàwùsè abu, bwà twètù pèetù twàmòna mwà kwalukila ku mbànzà yètù, twamba ne: “Myoyi yètù kayìwaku yilàkuka kapyà munda mwètù anyi?” Enzàku nàнку, Mukalenge, tudi ku díbà dyà dilòòlò cyàkàbìdi. Bwalu tudi tulòmba nùнку mu Dìna dyà Yesù. Amen.

<sup>13</sup> Mpindyewu ndi muswè kwakula bwà bwalu bwà Bible ewu. Nènku cyena-bwalu cyànyì dilòòlò edi, bwà mutù wà diyiisha, ùdi ne: *Myandà Yà Mikùkùkù Mitòokesha Kùdì Cipròfetà. Myandà Yà Mikùkùkù Mitòokesha Kùdì Cipròfetà.*

<sup>14</sup> Mpindyewu, Bible m’Mukàndà mushiilàngàne ne mikwàbò mikàndà yà cijila yònsò eyi. Bible m’Mukàndà mushiilàngàne. M’Mukàndà wà cipròfetà, wùdyànjlila kwamba myandà yà mikùkùkù yìcilwalwà. Ne Udi kàbidì Dibuuulula dyà Yesù Kilstò. Kubangila ànu ku Genèsè too ne ku Bwàkabuulwibwà, cidi cìMupàtula mu kaabujimà Kèndè, cìvwà Ye ne cidiYe aci. Ne Mukàndà mujimà, Bwàkabuulwibwà 1.1 too ne ku 3, mmwambè nè Mukàndà m’Mukàndà wà “Bwàkabuulwibwà bwà Yesù Kilstò,” didì Dìyì dyà Nzambì. “Dibuuulula dyà Yesù Kilstò,” Dìyì dyà Nzambì!

<sup>15</sup> Mpindyewu, mikàndà mikwàbò yònsò, mikàndà yà cijila, yìdi ànu tunungu twà dimanya dyà nsòmbelu, tunungu twà bùkàlàngà, anyì tunungu twà tèòlòjì. Cintu kampànda cidi...Mbanganyi bàkaadiku babalè Koran, Bible wa ba-Mùzùlùmanyì, ne—ne mukànda wa ba-Bouddhistes, ne bikwàbò? Cidi ànu tunungu twà dimanya dyà nsòmbelu, cìvwà bantu ne cyà kwikala bènza, mùshindù ùvwàbo ne cyà kwikala bènda, kàdi kayèna yàmba cipròfetà nànsha, kayèna yàmba cintu nànsha cìmwè cìtàngila biinè bintu ebi nànsha anyì pa bìdì bitàngilà mapà à pabwàwù àdì àfidiibwà kùdì muntu kanà yònsò ewu, cintu kanà cyònsò bwà kwenzekaci. Ànu mùdi kuya kashàala kwà mu diswa kampànda anyì cintu kampànda. Ki bwà cinyì, dìbà didì maèkèleeziyà àkafika mu cipidì cyà àvwija èkèleeziyà wawù ànu diswa kampànda dyà kulamatakù, dìbà adi bàdi kule menemene ne Dìyì dyà Nzambì.

<sup>16</sup> Bwalu Bible ùdi ne mwoyi, mudyànjlile kwamba bwà bujaadiki bwà Yesù Kilstò. Nènku mùdi buloba bufikè mu cyuwidi cyàbù, ne kàbidì mvinyò mikolè mu cyuwidi cyàyi, ditùkù didì dikola mu cyuwidi cyàdi, Bible wàkamwèneshiibwa mu cyuwidi Cyèndè mu Mupèrsònà wà Yesù Kilstò. Yèyè ùvwa Dìyì dyà Nzambì dibuuulula, Mukàndà wònsò nkòong wa Bupikudi. Bible N’Dìyì dyà Nzambì, didyànjlila kwamba myandà yà mikùkùkù yìcilwalwà. Beena kwitabuuja Bèndè mbabàtùmine dìyì kùdì MwenaWù bwà kubala ne kwitabuuja Dìyì dyònsò Dyàwù adi, kaciyi ànu katùpà kààDì cyanàanà to. Dìyì òmwèpelè, kubènga kuDìitabuuja, mbipiciibwe ne wèwè mulekèle kuteeta too ne pawìtabuuja Dìyì adi. Kakùyì mpatà to Dìyì dyònsò didì citùpà cyà Nzambì wa Bukolè bwònsò; Nzambì mumwènèshiibwe, mubwikila mu Dìyì Dyèndè, bwà kuleeja ne Yèyè ùdi Nganyi. Mbatùtùtùmine dìyì, twètù bu beena kwitabuuja, bwà kwitabuuja Dìyì dyònsò Dyèndè. Ne Dyòdì ndifùndiibwe kùdì MwenaWù Nzambì Yèyè mwinè. Kakwèna muntu nànsha umwe udi mwà kusàkidilaKù kantu anyì kuumushilaKù kantu nànsha kàmwè to. Bu wèwè mwà kwenza

nànkù, ncifwànyine kwikala mubidi mulè mà wà Nzambi. Ncifwànyine kwikala ne, pàmwápa bu mùdi minu yisambòmbò ku cyanza cimwè, anyi—anyi mabòkò àsàtù, anyi cintu kampànda, bwà wèwè musàkidila cintu kampànda, bwà wèwè muumùshilakù cintu kampànda newikale ne dibòkò dipangika, munu ùmwè mupangika. M’Mubidi mukùmbànàngàne wà Yesù Kilistò. Nè mu Kilistò, mwikàle Mulùme, Mubàki, Mukàji-musèla ùdi pèndè muleejiiibwe munda Mwèndè amu. Nè bàbìdi aba bàdi Umwe. “Mu ditùkù adi nenùmanyè ne Mémè ndi munda mwà Taatù, Taatù munda Mwànyì, Mémè munda mwènù ne nwènù munda Mwànyì.” Cimfwànyì kaayipu cikùmbànàngàne’s wè!

<sup>17</sup> Ne beena kwitabuuja balelèlà mu Dìyì edi, bàdi bàDìitaba mùshindù awu abu, bàdi bàDìitabuuja, nènku ne lutùlù bindila bwà milayi Yèndè myamba mu cipròfetà, wònsò wà ku yòyi bwà kumwèneshiibwa mu cikondo cyàwù. Mwena kwitabuuja yònsò mmucìndile. Mwena kwitabuuja yònsò udi ne mwoyi kuulu kuulu awu, mwindile, ki yèyè wìkala aci mwà kubuuludiibwa kùdiye.

<sup>18</sup> Mpindyewu tàngilàayi mu matùkù à dilwa dyà Mukalenge Yesù. Bwà cinyi bantu abu kabààkajingulula Yone, pàakambà Bible bitòoke tòò kùdi Yeshàayi ne: “Nekwìkalè dìyì dyà ewu udi wela lubilà mu cipèlèlà ne: ‘Longòlòlaayi njila wa Mukalenge’”? Mupròfetà wabò wa ndekeelu uvwabò nendè, udi mwikàle Maalàki 3 awu, wàkamba ne: “Mònaayi, Ndi ntùma mùsànjeelà Wanyì kumpàlà Kwànyì bwà kulongololayè njila.” Kabààkacimònakù bwà cinyi? Bwalu bàvwa bindile cintu kampànda cìvwà cimanè kwenjiibwa, bashìndikile meeji àbò pa mukenji kampànda ùvwà mudyanjile kupàtuka kwònsò aku, kàdi bàpange kumòna dimwèneshiibwa dyà Nzambi òvwàku mu ditùkù òvwàbò ne mwoyi.

<sup>19</sup> Nè beena Kilistò, myaba yònsò, ke mwaba wùdi bàà pa buloba bàsanganyiiibwa dilòlò edi ngwòwò awu. Kakùyì dipanganangana to, aci’s mbulelèlà! Beena Kilistò, myaba yònsò, bàdi bàteeta kutàngila paanyimà ku tunungu kampànda twà dimanya dyà nsòmbelu tùvwà Mukalenge Luther mufunde, anyi Mukalenge Wesley, Sankey, Finney, Knox, Calvin; twinè atu, ntùdi nànsha umwe wa kutùdi kàyì mwà kwamba cintu cibì bwàtù to, kàdi aci cìvwa mmu ditùkù dipite.

<sup>20</sup> Bafaalèsà abu bààkatàngila paanyimà bwà kumòna cyàkambà Mòsà, ne bàakamba ne: “Tudi ne Mòsà. Katwèna bamanyè kùdi Wèwè mufùmìne to.”

<sup>21</sup> Kàdi vùlukàayi ne, pàvwà Mòsà kaaba aka, kabàvwa bamanyè kùvwàye ùfùmìna to. Nwamònu anyi? Nènku mpindyewu bòbò... Kabyèna bikèmesha to pàakabàmbilà Yesù ne: “Nudi nulengeja nkità yà bapròfetà, ne nwènù ke bàdi babèlèmu.” Paanyimà pàà Mukenji wàbò mumanè kuya!



Mukenji ùdi munkaci mwà kupità, bantu bàdi bàWùmòna, bàdi bàWèlulwila (ke mùdi bàà pa buloba bènza). Nè pashiishe paanyimà pàà mùsànjeelà mumanè kujikija ne Mukenji mumane kujika, díbà adi bàdi bìibakila dìngumba pa Mukenji. Nènku's ki pòpò pàdìbo bàfwila apu, ànu mwaba awu mene, kabàyiku mwà kulwa kàbìdì ku Mwoyi to.

<sup>22</sup> Anji tàngilààyikù katanci kakesè cyanàànà, kùdì bàmwè bàà kunùdì, ne nangananga ndi ngàakula ne nwènù beena Kàtòlikè. Nudiku nufika ku dyumvwa ne, nukàatukù kacya babalè bwalu-bulonda bwà cyà bushùwà ebu, bwalu-bulonda bwà èkèleeziyà wa Kàtòlikè wa cyena Loomò anyi? Mùshindù ùdì mukàndà wènù wà bafwile diitabuuja awu, kwambwila ku Augustin Munsantu wa ku Hippo, mmìliyò búngì kaayi yà bantu bàvwà kabàmanyi bwalu bàakashebeya èkèleeziyà's! Ngàpù ne mwoyi, ncyèna mwà kutèèla búngì mu bwòbù menemene to, kàdi bùdi mu mìliyò, kwambwila ku Munsantu Hippo wa... Munsantu Augustin wa ku Hip-... wa ku Hippo, mu Àfrikè, wàkacìvwija mukenji bwà ne kakùyì mpatà to cìvwa ndiswa dyà Nzambì bwà kushebeya muntu kanà yònsò udi utontolola èkèleeziyà wa Kàtòlikè wa cyena Loomò. Nudikù nufika ku dyumvwa ne, ne Patrick Munsantu awu kàakajinguludiibwakù to ànu paanyimà pàà lufù lwèndè, bu mwena Kàtòlikè kàà cyena Loomò anyi? Wàkatontolola paapà ne byenzedi byèndè byònsò, ne èkèleeziyà wa Kàtòlikè yèyè mwìnè wàkashebeya binunu makùmi byà bàna bèndè. Nuvwakù bamanyè ne èkèleeziyà wa Kàtòlikè wàkoosha Jeanne d'Arc, mukàji mukesè munsantu awu, ku dikunji, bwalu ùvw-... bàmba ne ùvwa muloji. Bidimu nkàmà yìbìdì pashiishe, bàkuumbula kupàtula mibidì yà bansaserdòsè abu, pàakajandulàbo ne bàvwà bapiile, ne kuyèlabò mu mbù, kabàyi mwà kuyijiika mu buloba bunsantu nànsha, bwà kudikèngeshabo.

Kanùlekedì ditùkù dìnùpìcila pa mutù pèènù, kàdi kwikala bakùtākàne nànsha.

<sup>23</sup> Mùshindù mwìnè wùdì baakwidi abu bafwànyìne kuswa, dilòòlò edi, bwà kupàtuka, biine bàvwà bapiishe Yesù abu. Cintu cìmwèpelè cidìku ncyà nè, kabàakamònakù díyì didyànjila kwamba dyà díbà adi to. Bu bìikala... Yesù wàkamba ne: "Kenketaayi Mifùndu, bwalu mu Yòyi amu mmunùdì nwela meeji," anyi, èyowà's wè, "nwamba munùdìmu ne Mwoyi wà Cyendèlèlè, kàdi's Mifùndu ke yidì yìnwàmbila ne Mèmè ndi Nganyi," bwà diine díbà adi.

<sup>24</sup> Mònaayi ne, Bible kèna mwà kupangilakù to. Cintu cìmwèpelè cidìDi kadiyi mwà kwenza to, Díyi dyà Nzambì, nkupangila, bwalu Didi didyànjila kwamba byenzedi byà MwenaDì kumpàlà kwà Yèyè kubyènza.

<sup>25</sup> Mpindyewu, kùdì mpunga ùmwèpelè pa cinunu udi muntu mufwànyìne kudyànjila kwamba díyi kampàndà nè cintu

kampànda necyènzekè, ne cifwànyine kwenzeka. Nènku díbà adi yèyè mufunkùne *mwaba* wikalàci ne cyà kwenzekela, aci's cìdi cimupwekesha pàmwäpa ku mpùngà umwèpelè pa binunu dikumi. Yèyè mwambe *ditùkù* dikalàci mwà kwenzeka, bìdi bicìpwekesha panshì, mpùngà umwèpelè pa mùliyò mujimà. Nè *nganyi* wenzekelaci awu, aci's cìdi cìcìpwekesha ku miliyàlà yà mpùngà.

26 Kàdi Bible ewu ùdi ùkwambila ànu menemene ne *nganyi*, *dìbà*, *mwaba*, ne cintu *ciine* cyènzeka, kàdi kacitukù cipangile musangu nànsha wùmwè to. Kì bwà cinyì, mu kaamuyiiki kakesè kî nkwanji kwenza ntàntà to, ne nsaserdòse wa Èkèleeziyà wa Mwoyi Munsantu kaaba aka; kwambayè ne: “Mukalenge Branham, wèwè udi uteeta kwimanyina pa Bible.” Yèyè ne: “Aci's mbwalu-bulonda bwà èkèleeziyà.”

Mémè ne: “Kì mbwalu-bulonda to. N'Nzambi, Yèyè mwine, mutuuta ku cyamu.”

Yèyè ne: “Nzambi ùdi mu èkèleeziyà Wendè.”

27 Mémè ne: “Nzambi ùdi mu Díyì. Nè cyònsò cìdi cìbèngangana naaDì, cìikalè mashimi. Bwalu Yèyè wàkamba ne: ‘Diyì Dyànyì dìikalè dilelèlà ne diyì dyà muntu yònsò dìikalè mashimi.’”

Yèyè ne: “Katwèna ne cyà kukòkangana to.”

28 Mémè ne: “Ncìtukù mukulòmbè bwà twètù kukòkangana nànsha, kàdi Bible ùdi wàmba cyà bushùwà ne: ‘Lwâyì, twèlanganè meeji pàmwè.’”

29 Ùdi ùdyànjila kwamba byenzedi byà MwenaYe kumpàlà kwà Yèyè kubyèza. Kì bwà cinyì, pàndì ngàmba cyòci aci, díbà adi aci cìdi citèèka mulùme yònsò ne mukàji yònsò, ku Cibàsà cyà Cilumbulwidi kakùyì pàà kufinukila nànsha pàmwè to. Nwènu bangàte cìdi ba-Méthodistes bàmba pa Cyòci aci, cìdi ba-Baptistes bàmba pa Cyòci aci, cìdi Kàtòlikè wàmba, cìdi beena Mpenta bàmba, anyì èkèleeziyà mukwàbò kanà yònsò ewu, udi mufwànyine kupeta dyediibwa dyà màyi ku makàsà ku Cilumbulwidi. Kàdi bu nwènu ànu mwà kutàngila cìdi Bible wàmba ne necyènzekè aci, ne pàdici cyènzeka, díbà adi nenùjingululè cìdi cyènzeka aci.

30 Mpindyewu, kì ncimwènèke patòoke tòò bwà bantu bònsò kucimòna to, bwalu Yesù wàkasàkidila Nzambi bwà kucìsokoka ku mèsù kwà beena meeji ne batàlame, kàdi kuCìbuulwila bânà bu aba bàdi baswè kuyiila. Anji elàâyibì meeji bwà Nzambi wa Bukolè bwònsò udi musòmbè mu Díyì Dyèndè Yèyè mwine ewu, ne bukolè bwà kufofomija babanji ne babùle bundù ne—ne bamanyi bàà mabàlà balonge tùlaasà, kufofomija mèsù àbò mu mùshindù wà kabàyikù mwà kuMumòna to, kàdi kutàbeeja mèsù à papèlè ne bàdi kabàyi bamanyè mukànda abu.

31 Tàngilàayi bantu aba bàvwà bàfùmina ku Emawùsè, Yèyè wàkamba ne cyàbò—cyàbò cyumvwilu bwèndè Yèyè cìvwa cikàngìbwe. Bààkaakula Nèndè kàdi kabààkamanya nànsha ne Yèyè ùvwa Nganyì to, mu bule bwà ditùkù dijimà. Nzambì ùdi mwà kwenza cyòci aci, bwalu Yèyè ùdi Nzambì.

32 Ki cyòci aci menemene cyàkenzelàYe baakwidi abu, bafùndi abu, bwalu Byàkafùndiibwa ne bìvwa bikèngela bwà Yèyè kwenza nànkù. Nzambì wàkafofomija mèsù àbò bwà twamòna mwà kupeta mpùngà. Mònaayi ne, kabàvwa mwà kumònakù to, nànsha bàmba ne bàvwa bamanyi bàà mabàlà bàà bìshi, nànsha bìikàle baakwidi bàà bìshi, cyònsò cìvwbò bènzè aci, kabàvwa ànu mwà kuCimòna to, bwalu bàvwa mpofo. Lumòno lwàbò lùvwa lufwànyine kwikala makùmi àbìdi pa makùmi àbìdi, mu mubidi ewu. Kàdi lumònu lwà nyumà's!

33 Cintu cìmwècìmwè cìmvwà nteeta kwamba mu dindà emu pa bìdi bitàngilà masandi à bakàji, mvwàdilu wa mùshindù ùdìbo bàvwàla mpindyewu ewu. Mbendi bàà masandi. Mu Mukàndà wà Nzambì mbapiile bwà masandi musangu wònsò wùdìbo bàvwàla bilàmbà bìdi bilèèja bitùpà byònsò byà mubidi. Musùukà wàbò, kabàyi bacimanyè to. Ndi ngiitabuujà ne bòbò bakàji abu, bààbùngì bààbò, binunu ne binunu byà kùdìbo, kì mbamanyè bwalu to, ne kì mbafwànyineku kwenda masandi to nànsha byà kumòna lufù. Kàdi bakàji neebè bakwàte ne byà luse abu, ne muntu kampànda wabàlekela bènza cyà nànkù awu aci, kàyì ùcyèla patòòke ne ùbàmbila bulelèlè, bàdi bènda masandi. Pààbì, Bible mmwàmbè ne: “Mukàji wa masandi uvwa musòmbe pa màyi manène awu, uvwa ne bamfùmù bònsò bàà pa buloba ne bisàmbà byà pa buloba, maèkèleeziyà ne bikwàbò, bènda nèndè masandi à mu nyumà awu. Ne yèyè ùvwa MAMWÈNDÈ WA BANDUMBÀ,” màngumba.

34 Tudi tutàngila Bible, bwalu Nzambì kèna ùtùshiya mu midimà to. Yèyè wàkatùma Bible bwà kudyànjila kutwàmbila myandà yà mikùkùkù kumpàlà kwà kwenzekayi, ne ngiikàdìlù menemene ne cikondo cìvwayi mwà kulwa.

35 Mpindyewu, ncyenzè ànu bu kutàngila mu kabala matùkù bwà kumòna ditùkù dyà ngondo ditùdi. Pawikalà wela meeji, wamba ne tudi mu disambòmbò, anyì mu dyàlumingu, nditùku kaayi? Tàngilà ku kabala matùkù. Kabala matùkù nekàkwambile ne nditùkù kaayi. Panùdi numòna byenzedi byà bantu, pàmwàpa bàya mu èkèleeziyà, nudi nu—numòna nu. . . nuumvwa mùdi ngonga yidila, nudi nudikonka ne nditùkù kaayi. Tàngilàayi ku kabala matùkù, nekànwambile ditùkù ditùdi.

36 Nènku panùdi numòna èkèleeziyà ùbànga kwenza maalu à pa buloba, ànu mwàkadibi mu matùkù à Sodoma amu, mònaayi mùdi beena mu èkèleeziyà bàbwela mu. . . dikuukwila “nzambì wa cikondo cibì eci,” ne pa kumòna cyòci aci; pashiishe pa kumòna kasumbu kakesè kàà banyaàbanya badikungwije ku

disonsodiibwa dyà Nzambi, bàpàtula cyàkàbìdi Mwoyi wà Yesù Kilistò, ku Mifundu yidi ne cyà kwenzeka ayi, nudi bamanye díbà dinùdi ne mwoyi.

<sup>37</sup> Bible ewu ùdi ùdyànjila kwamba, ku cipròfetà, ditùkù ditùdi ne mwoyi edi, ne cikondo citùdi ne mwoyi eci, ne mmyandà kaayi yà mikùkùkù yidi ne cyà kwikala munkaci mwà kwenzeka. Ùdi ùdyànjila kwamba ànu menemene ku dileetà ne ku dileeta, kàdi kacya kàtu mwànji kupangilakù cikondo nànsha címwè to, díbà dyònsò. Musangu nànsha ùmwè kaCítukù cyànji kupangila to, ne kaCyàdyàkupangilàkwèè, bwalu aba bàdi badyànjila kulongolola bwà kucimòna nebàcimònè. Yesù wàkamba ne: “Muntu nànsha umwe kèna mwà kulwa kùNdi, pàdi Taatù Wanyi kàyì mumukòke to, nè bònsò bàdi Taatù muMpèèshe nebàlwe.” N’Díyì diikale dikalamakana ku Díyì. Kadyèna mwà kwenza cingà cintu to. Tudi bacimanye, ditùkù ditùdi ne mwoyi.

<sup>38</sup> Kàdi ànu mwàkadìbi mu cikondo ne cikondo cyònsò, bantu bàkalekela bantu bèèla dyumvwija dyàbò bòbò ku Díyì edi, nè kubàfikisha ku difofomijibwa ku mwandà wà mikùkùkù ùdi munkaci mwà kwenzeka. Cintu címwècímwè cyàkenzàci ne Bààfalèèsà ne Baasàdokà aci. Nànsha mene pààkiimanà Pòlo mwaba awu ne kuteeta kutèèla Mifundu, ne muntu mulùme kampànda kumubàngulaye dipi mwisù bwalu wàkabiikila mwakwidi mutàmbe bunènè ne cimanu cilaaba lupèmbà. Ki pashiishe kupangabò kumòna Nzambi ùshìndika Díyì Dyèndè dyà mu cipròfetà.

<sup>39</sup> Nwamònu’s, Bible kèna wàmba maalu àbèngangana Nendè to; Bible ùdi Nzambi. Kakwènakù dibèngangana dyà mèyì mu Nzambi to; Yèyè mmupwàngàne.

<sup>40</sup> Kàdi bantu abu, ne dyumvwija dyàbò bòbò’s! Mpindyewu mònaayi, lekèlaayi nnùlèjè, nwènù balundà bàanyi. Maèkèleeziyà kaèna mwà kupetangana pa dyumvwija dyàDì to. Ba-Méthodistes kabèèna mwà kupetangana ne ba-Baptistes to, ba-Baptistes ne ba-Presbytériens, ba-Presbytériens ne beena Mpenta. Ne malongolodi matwè ku makumi ànaayi à Mpenta, kabèèna mwà kupetangana muntu ne mukwèndè to. Pa nànkù nudi numòna’s, aci ncifwànyine kwikala cyàkàbìdi Baabùlòònà, cibwejakàjì.

<sup>41</sup> Kàdi Nzambi ùdi wènza dyumvwija Dyèndè Yèyè mwinè dyà Díyì Dyèndè. Yèyè wàkalaya cintu eci, ne pashiishe ùcyènza Yèyè mwine. Yèyè ùdi ùfila, Yèyè mwinè, dyumvwija dyà cyòci aci, bwalu Ùdi ùDìmanyisha Yèyè mwinè mu díbà adi. Ntántà bule kaayi ukààdi—ukààdi Mubidi wà Kilistò muyè kumpàla, kuumukila ku makàsà too ne ku mutù’s!

<sup>42</sup> Mònaayi ne, díbà adi ki bwà cinyì bantu aba bàdi bàpangila kucipeta, bwalu bàdi bàtèèleja cidì muntu mukwàbò wàmba pa Cyòci aci, pamutù pàà kubala Díyì bu mùvwà Yesù mubàmbile bwà kwenza amu ne: “Nènku Yòyì ayi’s ki Yidi yimfidila

Mémè bujaadiki. Kenkètaayi Mifundu, mu Yôyi amu mmunùdi nwela meeji ne nudi ne Mwoyi wà Cyendèlèlè, kàdi Yôyi ayi's ki Yìdi yimfidila Mémè bujaadiki." Mu ngaakwilù mukwàbò, tèèlejàayi: "Cinyi? Balàayi Mifundù ne nùmone civwà Maasiyà ne cyà kwenza. Mònaayi cikondo civwà Maasiyà ne cyà kulwa. Tàngilàayi nùmone ne nganyi uvwa ne cyà kudyànjidila Maasiyà awu. Tàngilàayi díbà. Kùdi ne cyà kwikala díyi dyà ewu udi wela lubilà mu cipèèlà, Yone. Kàdi nwènù nwákamwenzela cinùvwà balongòlè menemene. Tàngilàayi nùmone címvwà ne cyà kwenza pámvwà ne cyà kulwa. Kàdi mpindyewu cinùdi bènzè ncinyi? Ndi mupangè kukumbaja Eci anyi?" Nwamònu's, Yesù ngudi wakula ewu ne: "Ndi mupangè kukumbaja Eci anyi?"

<sup>43</sup> Mònaayi, patùdi twenda tupweka ne Mifundu mu mapingaja emu apa, mùshindù mene ùdi cintu ne cintu cyònsò civwà cyamba mu cipròfetà bwèndè Yèyè cyenzèke menemene ànu mùshindù ùvwàci ne cyà kwenzeka awu. S'bivwa bikèngela kwikalabò bamanyè mwandà wà mikùkùkù ewu. "Mukoleshi wa maalu ewu, Nsongàalume wa citende ewu wákajuuka, ne bidimu bitwe ku makùmi àsàtù ne bisàtù ne. . . anyi ne bidimu makùmi àsàtù, ne kuyayè kuntu kwàka ne kwakulayè bwà Makènkè à mishindù yònsò, ne Nyunyi yà Nkuci yibànda. Nènku, mòna's, civwa ànu bu—bundù." Bàakamba ne: "Wàkalediibwa ne baledi bàà mu masandi, bàmba pààbò mùvwàYe mulediibwe ku dileidiibwa dyà kùdi virgò."

<sup>44</sup> Kabivwakù bikèngela bwà kumanyabò ne Yeshàayi wákamba, mu Yeshàayi 9.6 ne: "Bàtùleledi Mwànà anyi?" Kabivwakù bikèngela bwà kumanyabò kàbìdi ne mupròfetà Yeshàayi wákamba ne: "Virgò neimitè difù anyi?" S'bivwa bikèngela kwikalabò bamanyè bintu ebi. Kàdi, nudi numòna's, bwalu bùvwa nè, bàvwa bàbùtùma mwaba kampànda kumpàlà. Kàdi Muntu ewu, bwàbò bóbò, kàvwa mukùmbànyine mwaba awu to. Kàdi Yèyè wàkabàkonka ne: "Kenkètaayi Mifundu, bwalu nudi nwela meeji ne mu Yôyi amu mmunùdi ne Mwoyi wà Cyendèlèlè, ne Yôyi ayi mene ke Cintu ciinè cìdi cìfidila Mukenji Wànyi bujaadiki." Kì ncìdi mwena tèlòlòjì kampànda mwambè to; kàdi civwà Nzambi, Díyi Dyèndè Sungasunga, mwambè ne necyènzekè's! Amen!

<sup>45</sup> Ke mùdìbi kàbìdi mpindyewu's! Kenkètaayi Mifundù, bwalu Yôyi ayi ke Yìdi yìtwàmbila díbà ditùdi ne mwoyi, yìtwàmbila ànu menemene ciikalà mwà kwenzeka mu ditùkù edi. Yôyi ayi ke Yìvwà yikèngelà nwènù kweyemena, bwalu Yôyi ayi ke Yìdi yìfila bujaadiki bwà Mupèrsonà wà Yesù Kìlistò. Bwalu Bible mmwambè, ne: "Yèyè ùdi umweumwe awu makèèlèlè, leelù, too ne kashidi," bwalu Yèyè ùdi dibuuludiibwa dyà Díyi mu cikondo aci. Kacyèna mwà kwikala cishiilàngànekù to.

<sup>46</sup> Ki bwà cinyi mu ditèèleja dyà dyumvwija dyà muntu, bàdi bà mòna dishindika dyà Díyi dyà Nzambi dyùlè, bàpanga kuDimòna. Bwalu, cìdi citùngùnùke ànu ne kwenzeka díbà

dyónsò, kàdi bwalu bàdi batèèleja... Ne Yesù wàkamba ne: “Bòbò mbalombodi bampofò.” Nènku mpofo yèyè ùlombola mpofo, cìdì cikabènzekelà ncinyì? Mpindyewu vùlukàayi ne, Bible mmudyànjìle kwamba ne cikondo cyà butèndeledi cyà Cikondo cyà Laòdikiyà eci cìvwa cìfofo. Bàvwa baMwele pambèlù pàà èkèleeziyà. Kakwèna cikondo cikwàbò, cikondo cikwàbò cyà èkèleeziyà, cìvwa Yesù ùsanganyibwa pambèlù to. Kàdi Cikondo cyà Èkèleeziyà wa Laòdikiyà, Yèyè ùvwa pambèlù, uteeta bwà kwalukilamù ne: “Ndi mwimàne ku cìbì nkookola.” S’Ùdi ne cyà kwikala munda amu. Kàdi Yèyè kwamba ne: “Bwalu wèwè udi wamba ne: ‘Ndi mubanji, mubanji ke mu bintu, ncyèna dijinga ne cintu nànsha cimwè to,’ kàdi kùyi mumanyè to, kùyi mumanyè nè udi mpofo, ulombola mpofo, mupele mu nyumà, mukèngeledi wa luse, mwena dikènga, mwikàle butakà, kàdi kùyi mucimanyè to.” Mbwalu kaayi-. . . Muntu mwikàle butakà mu mùsèsù, mwena dikènga, mpofo, ne mumanyè nè yèyè ùvwa ne cyumvwilu cikumbàne bwà wèwè kumwambila ne ùvwa butakà, ùvwa mwà kuteeta bwà kwenza cintu kampànda pa bwalu abu. Kàdi pàdiye ùkùpa mutù, wamba ne: “Ncyèna muswe Aci to. Wèwè udi nganyi bwà kungambila cyà dyenza? Ndi mumanyè mwaba wùndì mwimànyine.” Mpindyewu, aci cyòci kaciyi ngiikàdilù wà wèza luse to, ncyèna mumanyè to. Nènku’s ke cyòci aci menemene cìdì Nzambi wa mu Bible ewu mwambè nè ke cìkalà èkèleeziyà ne cyà kwikala, mu cikondo cìbì eci mpindyewu mène, mu cikondo cyà ndekeelu cyà èkèleeziyà mutùdì ne mwoyi emu.

47 Mònaayi nè, kàdi bwà bantu: “Bùngì bwònsò bùNdi munange abu, Ndi mbàtànndisha.” Mpindyewu, wèwè utandishiibwa kùdì Mukalenge, bwà cyùdì wenza aci, pàtukà muntwamu dìbà adi’s! Umùkèku. “Bùngì bwònsò bùNdi munange, Ndi mbàtànndisha.”

48 Mpindyewu, pa kumòna Nzambi, mpindyewu, amba tũng bu Bàfaalèsà abu mwà kwamba ne: “Ìndilà kakesè. Muntu awu mmutwele kadyòmbò kàà menemene’s, Yèyè nyawàmbì ne: ‘Kenkètaayi Mifùndù, bwalu mu Yòyi amu mmunùdì nwela mееji ne nudi ne Mwoyi wà Cyendèlèlè; Yidi yiMfidila bujaadiki.’ Mbitàmbe bwimpè bu mèmè mwà kupingaja mèsù mu Mifùndu ne kujandula cìdìYe ne cyà kwenza, Yèyè ùdi Nganyi, cìdì ne cyà kwenzeka aci. Bìvwà bìkèngela bwà mèmè kupingaja mèsù paanyimà ne kujandula’? Pamutù pàà cyòci aci, bàakaya kùdì baakwidi ne kubàkonka ne: “Kàdi bishi bwà Eci nùnkù’s?” Nudi numòna dishìlangana anyi? Bìvwa bìkèngela kwikalabò bàbala Dìyi.

49 Mu Ebèlù 1.1, Bible mmwàmbè ne: “Nzambi, mu bikondo byà kale,” mbwena kwamba ne: “bikondo byà kale ne mu mshindù mishiilèshìlàngàne wàkafùndila Bible ku bapròfeta.” Mpindyewu mònaayi nè, Yèyè ngwàkafùnda Bible ku mùshindù Wèndè Yèyè mwinè musungula. Nwamònu anyi? Mpindyewu,

kabivwa bikèngela bwà Yèyè kuMufùnda mùshindù awu to, anyi kabyàkakèngela bwà Yèyè kusungila muntu ku Mashi to. Kabivwa bikèngela bwà kuyiishilaYè Èvànjeeliyò kùdì muntu to; Ùvwa mufwányine kulekela díbà anyi ngondo anyi mitootò yiyiisha Èvànjeeliyò, Yèyè ùvwa mwà kulekela mpeepèlè yìpùùdila Èvànjeeliyò. Kàdi wàkasungula muntu's! Nènku Yèyè wàkasungula njila uvwa Díyi Dyèndè dilwilè, ne yèyè awu ùvwa nku bapròfeta Bendè bàvwa badyanjila kulongolola ne badyanjila kutèeka, mwikàle citupà cyà Díyi dyà Nzambi, mwikale wàmba dibuulula dyà Díyi Dyèndè bwà cikondo aci ne díbà adi. “Bwalu Díyi dyà Nzambi dívwa dilwa ànu kùdì bapròfeta nkàâyabo.” Kacya Dyòdì kaditukù dyànji kulwa kùdì mwena tèòlòjì to. Ndeejàayi Mufùndu. Ditu dilwa ànu kùdì bapròfeta nkàâyabò. Nzambi kènà mwà kushima to. Pa nànkù Nzambi ngwàkafùnda Bible ku mùshindù Wèndè musungula, ne bapròfeta Bendè Yèyè mwinè basungula; kì mbapròfeta bàvwa muntu musungùle to, kàdi bapròfeta bàvwa Nzambi musungùle.

<sup>50</sup> Díbà adi beena kwitabuuja Bèndè bàdi bàkèba dyula dyà cyàkambà mupròfeta wabò, nènku s'ki dimanyishiibwa ndyòdì adi dyà ne mbapròfeta bàà Nzambi. Bwalu, dyàmbedi, mbasonsòdiibwe. Pashiishe, bàdi bàshààla ànu menemene ne Díyi dyà díbà edi. Nànkù aci s'ki yèndè mikàndà yà dijaadikiibwa naayi nyòyi ayi. Nwamònu's, tuvwa bacimòne mu dyàlumingu dishààle adi. Bapròfeta bààbùngì bàà mashimi nebàjuukè. Ne tudi tufila bifwanyikijilu byà mùvwà Baalàmà ne Mòsà, bùbìdì bwabò balaabiibwe nè Nyumà umweumwe, umwe wabò kwambayè ne: “Tudi bònsò umwe. Lwàyì tùdisangè, tuteekè bânà bèètù bàà bakàjì ne byònsò pàmwè. Tudi ne nsongàakàjì milenga lwà mwab'ewu, nènku nwènù bansongàlùmè lwàyì kùnweku ne nùsungule mukàjì mulenga. Aci's cidi ànu cimpè, twètù tudi bònsò cisàmbà cimwè, mu mshindù yònsò, cisà ànu cyòci cimwècimwè eci.” Kacya Nzambi kàakabàfwilakù luse bwà bwalu abu to. Bààkacitèeleja.

<sup>51</sup> Nwamònu's, buloba ne ba—bantu mbindile ntùkà mukesè kampànda, pàà kufinukila pakesè, kajila kakesè kàà cikòsò, kàdi kakwèna byà tujila twà bikòsò mu Díyi dyà Nzambi to. Kùdì Citembelu cimwèpelè. Udi ne cyà kudipempa nkàâyebè bwà kukùmbànangana ne Citembelu aci, kì nguteeta bwà kupempa Citembelu bwà kukukùmbanaci wèwè to. Bantu bònsò bàdi ne cyà kwenza nànkù. Ki mùshindù wùmwèpelè wùdì naawù Nzambi bwà kucyènza.

<sup>52</sup> Mònaayi mpindyewu nè, beena kwitabuuja mbindile Díyi adi bwà kushindikiibwaDì. Nwamònu's, kaDívwa difùndiibwe kùdì muntu to, kàdi kùdì Mukalenge Nzambi, ki bwà cinyi Kì mmukàndà wà muntu to.

<sup>53</sup> Muntu kampànda wàkamba ne: “Ùdi ànu ndambù wa mifùndu yà kale yà beena Ebèlù.” Beena Ebèlù bàvwaku bafwányine kufùnda mukàndà ùvwa ùbàpiisha bóbò biinè

anyi? Ditunga dîmpè dyà beena Yudà adi, bàà nsòmbelu wa pabwèndè ne wa kapelu abu, bàvwakù bafwànyine kufùnda bubì bwàbò mene, bàdipiisha bóbò biinè nkààyabò anyi? Nànsha byà kumòna lufù. Bàlonda mpèèkaatù yààbò bóbò biine, mùshindù wàkabwelàbò mu dikuukwila dyà mpingù, mùshindù wàkendàbo masandi kumpàlà kwà Dìyi dyà Nzambi amu anyi? To, to. Kì mbafwànyinekù kulonda abu bwalu to, ditunga dyà maleela adi.

<sup>54</sup> Kì mmukàndà wà muntu to. M'Mukàndà wà Nzambi. Nènku muntu udi umòna bikèèna-kumòna anyi ùmvwa Dìyi dyà Nzambi awu, (misangu yàbùngi) kàvwakù ùcùmva yèyè mwine to, misangu yàbùngi. Nwamònu anyi? Muntu kí ngwàkafùnda Bible to. Nzambi ngwàkafùnda Bible. Kì... Kì mmukàndà wà muntu to. M'Mukàndà wà Nzambi. Mmeeji à Nzambi mapàtula patòòke ku mishikù yà buntu. Ki cidì cìMuvwija Bible ncyòci aci. Meeji mapàtula patòòke adi dīyi. Nè ku cibangidilu kwàkadi Meeji à Nzambi, Yèyè wàkaApàtwila patòòke ku mishikù yà bapròfeta Bèndè ne kuÀshindikila ku basadidi Bèndè. Nwamònu anyi? Mònaayi.

<sup>55</sup> Nzambi ùdi wènzà disungula Dyèndè Yèyè mwine, ku didyànjlila-kulongolola, wàkasungula bapròfeta bwà cikondo ne cikondo cyònsò. Mònaayi bwalu abu. Yèyè udi ulongolola ngiikàdilù wa mupròfeta awu bwà kukùmbanganayè ne cikondo aci. Nwamònu's, Yèyè udi ùkùmbaja wèndè ngenzèlù wa maalu, cyònsò cidīye wènzà aci. Ùdi ùmukùmbaja nànsha yèyè mulongè kàlaasà anyi kàyi mulonge kàlaasà. Udi ùkùmbaja mapà, mùshindù wàyishàye, mapà ikalàye naawù. Nè Mukenji bwà cikondo aci, Nzambi mmudyànjlila kulongolola cintu kampànda aci bwà kwenzekaci ne kakwèna cikwàbò cintu cidì mwà kwangata kaaba kàaci to. Nànsha ciikàle cinyi, nànsha byenzedi byà bulòbò byà bantu biikàle búngi munyi, cintu nànsha cimwè kaciyèna mwà kwangata kaaba kàaci to. Wàkadyànjlila kulongolola muntu awu, pàmwàpa muntu mupangi. Úvwa mufwànyine kwikala mudyànjlile kumulongolola muntu wa mùshindù mukwàbò. Cyònsò cidīye aci, Yèyè ùdi ùmupèèsha cyèndè cipidì, dyèndè—dyèndè dipà, ùmupèèsha wèndè ngiikàdilù, ngenzèlù wèndè wa maalu, ne cyònsò cidīku aci, mùshindù ùdiye wàkula, ne cyònsò cidīye wènzà aci. Yèyè ùdi wènzà muntu wa dībà adi bwà kubàkula cisàmbà cyà dībà adi. Cyà bushùwà. Yèyè ngudi ucyènza.

<sup>56</sup> Ku ndekeelu kwà cikondo ne cikondo cyònsò, pàkaadi èkèleeziyà mutàngile kùdi buloba ne mpèkaatù, ne mweyèmène pa dyumvwija dyà muntu dyà Dìyi. Ànu mùtùbi kwònsò eku amu, misangu yònsò, ku ndekeelu kwà cikondo, mubweja mu cimvundù bu nànkù kùdi beena tèlòlji bààbò ne bansaserdòsè too ne mùdibi bikashààla misangu yònsò ànu cimvundù. Misangu yònsò dyumvwija dyàbò ndyà mashimi, musangu nànsha umwe kacya kacitukù cyànji kupangila kwikala cyà



mashimi to. Ne musangu nànsa ùmwè Díyì dyà Nzambi kaditukù dipangè kwikala dimpè to. Ki dishiilangana ndyòdi adi.

<sup>57</sup> Mpindyewu nudi numòna's, Nzambi wàkafùnda Bible, Yèyè mwinè. Mpindyewu, Nzambi ùdi mwà kwakula. Mòsà wàkamba nè Yèyè wàkaakula nendè. Yelèmiyà kwambayè ne: "Wàkatèeka Méyì mukana mwànyì." Nènku Nzambi ùdi mwà kufùnda. Yèyè ngwàkafùnda mikenji dikumi ne munu Wèndè Yèyè mwinè. Wàkafùnda pa bimanu byà Baabùlòònà. Nènku, vùlukàayi ne, bwà mu Dipungila Dikùlukulu amu nkàayamù, misangu binunu bibidi bapròfetà bàakamba ne: "EMU MMÜDÌ MUKALENGE WAMBÀ!" Nzambi ùdi mwà kwakula, Nzambi ùdi mwà kufùnda. Cyà bushùwà. Pàmwè ne byà pa lukàmà makùmì citèemà byà Maataayi, Maakò, Luukà, ne Yone, m'Méyì mene à Nzambi Yèyè mwinè, Yesù Kilstò ngudi wakula ewu. Pa nàнку, piikalà Nzambi mwà kufùnda, piikalà Nzambi mwà kubala, piikalà Nzambi mwà kwakula, Yèyè kèna mwà kufikisha bakwàbò ku dyenza cintu cimwècimwè aci anyi? Yèyè kàakambilakù Mòsà ne: "Udi uvwija muntu kamàmà anyi udi umupèsha dyakula nganyi anyi?" Nzambi wàkafùndila Bible ku bapròfetà, mùshindù Wèndè wà dicyènza.

<sup>58</sup> Mpindyewu musangu wònsò wùdì èkèleeziyà ùpeta cibwejakàji (nè Nzambi ùkaavwa mudyànjile kumanya ne mmùvwàbi mwà kwenzeka, bwalu Yèyè wàkadyànjila kumanya bintu byònsò), ki bwà cinyì Yèyè ùdi ne mupròfetà Wèndè kampànda mulongolola bwà cikondo aci, bwà kubiikila basungula Bèndè ku Díyì Dyèndè dishindika dyà bimanyinu ne maalù à kukèma, ne dishindika dyà Díyì Dyèndè ne: "ùshindika Díyì ne bimanyinu byènda bilonda," mwàkalayàYe. Yèyè ùdi ùfila dyumwija dilelèlà paanyimà pàà mupròfetà yèyè mwinè mumanè kwikala mùshindìkùbwe.

<sup>59</sup> Bònsò, pa kumusha basungula bàkatùmiibwàyè kùdìbo abu, bàakamukina. Mpindyewu, kenkètaayi ku musangu ne ku musangu kàdi nùmònè ní ncyà bushùwà anyi kí ncyà bushùwà. Ànu aba bàdiYe mutùmùbwe kùdìbo abu! "Yèyè wàkalwa kùdì bàà Kwàbò Sungasunga, kàdi bàà Kwàbò Sungasunga kabààkaMwakidila to. Kàdi bònsò bààkaMwakidilà abu, Yèyè wàkabàpèèsha bukolè bwà kulwa bánà bàà Nzambi." Mònaayi nè, to...diteeta dyònsò dyà Díyì, mu cileejilu cyònsò, nè ku ndekeelu kwà cikondo ne cikondo cyònsò anyi mu katòngòbèlà anyi mu ntàngenu, mùmvwà muyiishèpù misangu ne misangu.

<sup>60</sup> Tàngilàayi cikondo cyà Noà, ku katòngòbèlà kumpàlà kwà cilumbulwidi. Cyàkenzeka ncinyi? Noà, òvwa ànu dikù dyèndè yèyè mwine dyàkiitabuujà muntu awu. Bakwàbò bònsò abu kumudyùlabò. Ke kubutulayè buloba bujimà.

<sup>61</sup> Mu matùkù à Abraham, ànu kasumbù kàà Abraham ki kàakiitabuujà's. Pàakayà Banjèlò kuyiishabò ku Sodomà,

ànu Lotà ne mukàjèndè ne bânà bèndè bàà bakàji bàbidi mbààkapàtukà, ne mukàji awu wàkandamuka dikunji dyà mukèlè.

<sup>62</sup> Mu matùkù à Mòsà, ànu basungula bàà Izalèèlà mbààkapàtukà. Ki Pàlò kumukinayè.

<sup>63</sup> Mu matùkù à Eliyà, byònsò (pàmwè ne byònsò) pa kuumusha ànu bantu binunu mwandamutekète, muntu ne muntu wa kùdibo wàkamukìna, ditùnga dijimà.

<sup>64</sup> Mu matùkù à Yelèmiyà, mòna's, bàakamwasa bimuma bìvwà kabiyi bibobè, ne bàakamubiikila ne mmukoleshi wa maalu, bwalu wàkalààdila luseke lwèndè munda mwà matùkù búngì kampànda, ne luseke lukwàbò, ne—ne kwangata bintu ne kwenza bimfwànyi. Kumukinabò.

<sup>65</sup> Yeshàayi mupròfetà awu, wàkapiiisha cisà aci bikolè mu mùshindù wà ne bàakamupanda mu bipese bìbidi nè sí. Cyà bushùwà.

<sup>66</sup> Yone Mubàtiji. “Ùvwa muntu wa mu cisuku kuntwaku, mubùlùke kampànda wa wèla mbilà.”

Bònsò pa kuumusha—ànu bayiidi bàakaleejàye Yesù Kilistò bu èkèleeziyà abu! S'ki cyôci aci. Yone wàkalongolola cisàmbà. Mbantu búngì kaayi bavwaye naabò? Nudi mwà kubàbala ku minu yìbidi. . . yà byanza bìbidi, minu yènu ayi, búngì bwà bantu bàvwà Yone mulèjè Yesù pàkalwàYe. Mpindyewu, kàdi bishi bwà Dilwa Dyèndè diibìdi? Anji elàngànaayi meeji pa bwalu abu.

<sup>67</sup> Kàdi pàdi beena kwitabuuja balelèlà bàà Bible bamòna Dìyi dishìndika patòoke menemene bwà cikondo, bàdi bìitabuuja. Kakwèna mùshindù wà kubàpangishaDì to, kubàpangisha kuDìitabuuja. Bàdi mene bàtwa citampì ku bujaadiki bwàbò ne mashi àbò. Bàdi bàDìitabuuja. Dìbà adi mbòbò, badyànjila kulongolola abu, bwà cikondo aci bàdi bàcimòna ne bìitabuuja.

<sup>68</sup> Bakwàbò kabèèna ànu mwà kuCimòna to; mbafofomija. Mpindyewu, wèwè udi wamba ne: “Kabèèna mwà kuCimòna to.” Mpindyewu, bu Baalàmà, bwà cinyi Baalàmà kàvwakù mwà kuCimòna? Yèyè ùvwa mupròfetà, mwela maanyi. Bwà cinyi Pàlò kàvwakù mwà kuCimòna? Pàakamònàye cyanza cyà Nzambi cìpweka ne cyèza bishimà muntwamu, cyàkapapisha ànu mwoyi wèndè. Ncyà bushùwà anyi? Datànà kàvwa mufwànyine kuCimòna bwà cinyi, yèyè mwinè mwena Yudà? Ànu kuntwaku, bàvwa bapicile mù Mbù Mufwè, ne badyè manà dilòlò dyònsò, àcìvwà àmacilakù, kàdi kabàyi ànu mwà kuCimòna to. Bwà cinyi Koolà kààkaCimòna? Kaayifà kààkaCimonakù bwà cinyi? Yèyè's ùvwa muntu ntùngààmùlóngò wa maalu à ntèndeleele pa buloba mu ciinè cikondo aci. Bwà cinyi kààkamòna nè awu ùvwa m'Maasiyà awu? Yudààsà kààkaCimòna bwà cinyi? Yudààsà yèyè ùvwa ànu naabò, wèndakana naabò, wènza naabò bishimà. Kàdi Dìyi òvwa ne cyà kuujibwa. Bible ùdi wamba ne bàakajudiibwa

bwà kwangata kaaba aku. Bààkajudiibwa bwà kiipàcìlà aku. Ncyà bushùwà. Loomò 8 ngudi wamba nànkù.

<sup>69</sup> Mpindyewu beena kwitabuuja bàdi mwà kumòna ne Dìyì ndivwijìibwe mubidi mu lukòngò lwàbò, Nzambì munkaci mwà kwakula. Mpindyewu, bôbò beena kwitabuuja balelèlà menemene abu, binunu mwanda mutekète abu (ànyì bàvwa nkàmà mwandamutekète?) mu matùkù à Eliyà amu. Binunu mwandamutekète ki mwómò's. Mu matùkù à Eliyà, kùvwa bantu binunu mwandamutekète pa mìliyò mitwè ku yìbìdì anyì yìsàtù, bààkamònà nè Cyòci aci civwa cilelèlà. Kacivwa nànsha mene cyà pa lukàmà cimwè cyà bantu to, nànsha pàmwè naaci to. Kàdi bôbò bààkamòna ne Civwa cilelèlà. Bààkamòna Nzambì mumwènèshìibwe. Mukàjì mukàmba wa kale uvwa Elishà mutùmìibwe kùdìye awu, wàkaya kakeba tukunyi atu, bwà kwenza kàtò, ne ànu bùngì bukumbàne bwà kwenza kàtò bwèndè yèyè ne mwanèndè wa balùme, ne pashìishe kufwà. Kàdi tàngilàayi Eliyà, wàkamba ne: “Anjì ngenzèlè mèmè kàmwèpelè, dyàmbedi. Bwalu, EMU MMÛDÌ MUKALANGE WÀMBA, cipanza kaciyakupangilaku bukula to ne anyi kàsù aku kakaàkushààla munda mutupu to too ne mu ditùkù dyàtùmà Mukalenge Nzambì mvùla pa buloba.” Kààkeela mpatà to, yèyè wàkadibwinka dyàkàmwè mu dyenza dyà kàtò ne kumupèeshakù. Wàkamba ne: “Anjì ngenzèlè mèmè kumpàla, ne pashìishe ùye kenza kèèbè ne mwanèbè.” Bwalu, wàkumvwa muntu awu, ne kumutàngila; yèyè ùvwa dimiinu didyànjila kulongolola.

<sup>70</sup> Bààbùngì bàà kùdìbo bàdi bàmba ne: “S'ki mukulakaji wa cimfiikààmundà awu cyàkàbìdì. Nzambì wàtwèdì mulawu bwà bwalu bwèndè,” vùlukàayi, Eliyà. Awu ne: “Wèwè ngudi utacisha Izalèlèlà.”

<sup>71</sup> Yèyè ne: “Wèwè ke udi utàcisha Izalèlèlà.” Nudi numòna ne Nzambì ùdi nganyi. . . Dìyì òvwaYe ùshìndika òvwa dyà nganyi? Dìyì Dyèndè Yèyè mwine.

<sup>72</sup> Mpindyewu Bible ùdi wàmba ne bààkajuudiibwa bwà kiipàcìlà aka, kàdi pàvwà. . . mwena—mwena bupidyà. Kàdi mpindyewu pàdì mwena kwitabuuja mulelèlà mwà kumòna Dìyì dyà cikondo aci òvwiijìibwe mubidi, Nzambì wàkwila ku mishìkù yà buntu ne pashìishe wènza ànu menemene cyàkambàYe ne Neènzè, aci ncikòse bwalu!

<sup>73</sup> Mpindyewu tàngilàayi cikwàbò citùpa cyààci. Kanùtàngidi bimanyinu to. Nwènu batàngile bimanyinu, nenùkutakajìibwè ànu byà menemene. Bapròfetà bàà mashimi nebàjuukè ne nebàleejè bimanyinu ne maalu à kukèma bìikalà mwà kuseeswisha basungula bu ne bìvwa mwà kwenzeka. Tàngilàayi Dìyì. Tàngilàayi baakwidi aba, bapròfetà aba, mupròfetà wa beena Ebèlù mwimàne mwaba awu. Sedèkiyà ne nsèngu minène yìbìdì, wàmba ne: “Mèmè ndi mupròfetà muteeka mu

mudimu kùdi Nzambi.” Ncyà bushùwà. “Ndi ne nkàmà yisàtù ne makumi citèemà ne citèemà ànu kaaba aka mene naanyi, ne Nyumà Mwímpè pambidi pèètù, ùshindika ne wàmba ne buloba abu mbushààle bwètù twètù. Tùbandààyaaku tükabwängàtè. Ne ku nsèngù eyi, Aakàbà, neusakè mwena lukunà awu àpàtukè mu buloba bwètù, bwalu Nzambi mmutùpèèshe buloba abu.”

<sup>74</sup> Tàngilàayi mutèndeledi awu, muntu mwímpè, Yèhoshàfàtà, kwambayè ne: “Kwènàku ne mukwàbò kàbìdì anyi?”

<sup>75</sup> “Mukwàbò kàbìdì? Nkàmà yinaayi s’nyôyi eyi mu dipetangana!” Yèyè ne: “Èyo, kùdi mukwàbò kàbìdì lwà mwaba ewu, kàdi mèmè ntu mumukine.” Yèyè ne: “Ùdi misangu yònsò ànu ùtùtândisha twètù bònsò ne ùtwàmbila mutùdi bangènzàmpèkààtù banène, ne bikwàbò byònsò.” Wamba ne: “Mèmè ntu mumukine! Yèyè, yèyè’s m’Miikà, mwànà wa Imlà.”

<sup>76</sup> Yèyè ne: “Kaa, mfùmù kàtu wàkula nàнку to. Ndàayi nùkamutwàle tùteeleja cyàmbàyè.”

<sup>77</sup> Ki kuyabò nendè kuntwaku. Yèyè ne: “Mpèèshaayi bufùkù ebu nènku nèmmonè cìdì Mukalenge wàmba pa bwalu abu.”

<sup>78</sup> Aakàbà kwambayè ne: “Ndi nkutumina díyì, kùngambìdìku cìngà cintu nànsha cimwè to ànu bulelèlà.”

<sup>79</sup> Ke muntu awu kulwayè, kwambayè ne: “Mpindyewu, pawikalà muswè kwalukila mu bwobùmwe bwímpè, ambà ànu bu bakwàbò bwònsò.”

Miikà kwambayè ne: “Nèngàmbè ànu cìdì Nzambi wàmba aci.” Nwamònu anyi?

<sup>80</sup> Pàākacyàbu mu dindà, bàākapatuka. Bamfùmù kuvwàla mìzàbì yàbò pambidi, kusòmbabò mu ciibi amu, ne bantu bònsò bàà bamanyike bikolè abu. Mupròfètà mwimàne mwaba awu. Kwambayè ne: “Mpindyewu, mukoleshi wa maalù wè, cyùdi wamba pa bwalu abu ncinyi?”

<sup>81</sup> Yèyè nè: “Ndàaku.” Yèyè nè: “Kàdi ndi mumòne Izalèèlà mutangalaja byenze bu mìkòòkò kayiyi ne mulami to.”

<sup>82</sup> Wàkamubàng-...wàkangata cyanza cyèndè kàdi kumubàngula dipi mu mbàngà. Mupròfètà wàkabàngula mupròfètà dipi mu mbàngà. Mpindyewu, bònsò abu bapròfètà balaaba biimàne mwaba awu, bàmba cipròfètà, nkàmà yinaayi bàlwisha umwe, cìvwa cimwèka cyà makàndà menemene. Mpindyewu, mu búngì bwà mibelu kamwèna misangu yònsò ànu dikùbiibwa to. Mbilààle ku mwaba ùdìbo bàsanganyiibwa... cìdìbo bàfidila mubelu, cìdì mubelu wàbò mwine awu. Kakùvwa dikùbiibwa muntwamu bwà mfùmù to, ne yèyè wàkangata cibúngì cyà mibelu yàbò ayi bu ne cìvwa cilelèlà. Kàdi bu wikalà ànu mwimàne ne mukùdimùke mubuulùle muvùngù ne mutàngile cìvwa Eliyà ùfuma ku dyamba aci’s wè!

<sup>83</sup> Dìbà adi, Miikà kàvwa mwà kwamba cintu nànsha cimwè to, kàvwa mumanyè to, pàmwàpa s’Nzambi ùvwa kumufwila

luse bwà bwalu abu díbà adi. Kàdi dyàmbedi, bu mùvwàye mupròfetà, wákaya kùdi Nzambi bwà kujandula cìvwà Nzambi mwâmbè. Ki kujandulayè cìvwà Nzambi mwâmbè. Yèyè kwamba ne: “Mémè kumòna Nzambi musòmbe pa nkwasa wa butùmbi, ki Yèyè kwamba. . . ùvwa ne bamupèeshi Bèndè bònsò bàà ngenyi bàà mu Dyulu badisangishe ku nyungulwilu Wendè, wamba ne: ‘Nganyi utùdi mwà kutùma bwà àpwekè àkenzèjè Aakàbà bwà àlwe mwab’ewu, bwà Twàmòna mwà kuuja mu mùshindù kampànda cipròfetà cìvwà cyenza bwà bwalu bwèndè?’”

<sup>84</sup> Nwamònu’s, cipròfetà, Eliyà ùkaavwa mumanè kwamba ne: “Mbwa neyilakè mashi èbè.”

<sup>85</sup> Pa nàнку kwambayè ne ùvwa “mumòne nyumà wa mashimi ùpàtuka mwinshi, ùbànda, ùbànda ùlwa kumpalà Kwèndè, wamba ne: ‘Nèmpwekè nye kabwela munda mwà bapròfetà bèndè, bapròfetà bàà Aakàbà, ne nèmbàfikishè ku dyamba dyà cipròfetà cyà mashimi.’”

<sup>86</sup> Mpindyewu, Nzambi ùvwa mumanyè ne bantu abu bàvwa ne dyambu dyàbúngi ne bùle tètè ne tèlòlòjì mu mùshindù wà ne bàvwa bèela meeji ne bàvwa ne bintu byònsò ànu mu byòbi. Kacya kabàvwakù bánji kumòna Díyi bwà díbà adi to. Ki Nzambi kwamba ne: “Neùtuutè dyàkalenga; tungùnuka ndàaku.” Kàdi pàakambà Miikà cintu aci, cyòci aci cyàkabàfikisha ku dyamba cipròfeta mwinshi mwà bulombodi bwà nyumà mubi. Bàvwa bafwànyine kwikala batùle nshinga wa tèlèfonè, anyi bakàngè cisanji, anyi bènzè cintu kanà cyònsò; kuumvwabo Cyòci aci cyènda cibalwisha, kujuukabò e kupàtuka. Kàdi tàngilàayi nùmonè cyàkenzekà. Mpindyewu, byàkakèngela bwà Miikà kukenketayè cikèènà-kumòna cyèndè ne Díyi difùnda, ki bwà cinyi yèyè ùvwa mumanyè.

<sup>87</sup> Yèyè kwamba ne: “Pàngààlwà. . . Elàayi muntu awu mu bùlokò, nùmupèeshaayi màyi à kanyinganyinga ne dyàmpà dyà kanyinganyinga. Pàngààlukila, nemmonè cyà kwenza nendè.”

<sup>88</sup> Yèyè kwamba ne: “Bwà wèwè mudidinge ànu mwalùkile, Nzambi kí mmwakùle naanyi to.” Apu mpàdiye mumanyè ne cikèènà-kumòna cyèndè cidi cìpetangana menemene ànu ne Díyi dyònsò bwà díbà adi. Cìvwa ncikondo cyà Aakàbà.

<sup>89</sup> Mwanèètù wa balùme, mwanèètù wa bakàji, ki díbà ndyòdi edi ne cikondo cyà dibùkila dyà kupàtuka mu Baabùlòonà. Makènkè à dilòlò àdi kaaba aka. Endèlà mu Bukènkè pàdiku bukènkè apu. Mònaayi, beena kwitabuuja bàakamòna Díyi dimwènèshìlbwe ne kuDìitabuuja. Yesù wákamba ne: “Mikòòkò Yànyi mmimanyè Díyi Dyànyi, Díyi Dyànyi, bimanyinu Byànyi byà cikondo. Wa mashimi yòyi kayàkumulondakù to.”

<sup>90</sup> Mpindyewu tùfikàayi ku cyena-bwalu cyètù, bwalu ndi mmòna nè nenyè kule naaci. Ndi njinga kupoopela bikolè pa mulongo wà babèèdi awu bikolè. Twàlukilàayi ku cyena-bwalu mpindyewu citùdi munkaci mwà kutàngila eci, bwà katanci

kakesè cyanààna. Èè, necyènzekè cyàkàbìdì ànu mwàkenzekàbì misangu yònsò amu, bu pa ciibidilu.

<sup>91</sup> Nzambì wàkatùma mupròfetà Wendè, Yone, bu mùvwà Dìyì Dyèndè dyàmbè, dilayè mu Maalàkì 3 ne: “Mònaayi, Ndi ntùma mùsànjeela Wanyi kumpalà Kwànyì, bwà kulongololayè njila.” Yone wàkajaadika cintu cìmwècìmwè aci. Ne tudì kàbìdì tusangana, mu Yeshààyì 40.3 ne, Yeshààyì mmwambè ne: “Nekwikalè dìyì dyà mupròfetà, muntu udi wela lubila mu cipèèlà ne: ‘Longòlòlaayi njila wa Mukalenge.’” Nwamònu anyi? Bìpròfetà byònsò abi! Nènku—nènku tàngilààyì, mònaayi ne lùkàsà lwònsò, Mufùndu wùvwà wùmumanyisha.

Pàakambàbo ne: “Wèwè udi nganyi? Udi Maasiyà awu anyi?”

Yèyè ne: “Bwèhe.”

“Wèwè udi Yelèmiyà anyi? Bapròfetà abu, anyi umwe wa kùdìbo anyi?”

<sup>92</sup> Yèyè ne: “Bwèhe. Kàdì mémè ndi dìyì dyà ewu udi wela lubilà mu cipèèlà, bu mwàkambà mupròfetà Yeshààyì.”

<sup>93</sup> Nudi nwela meeji ne bôbò bàvwa bafwànyine kwitabuuja aci anyi? To, mukalenge. Bwà cinyì? Yèyè kààkalwila mu èkèleeziyà wabò awu to. Kàvwa wa ku bààbò... Nwamònu’s, wàkaya mu cipèèlà pàvwàye ne bidimu citèemà, kàdì kupàtukamu ne bidimu makumi àsàtù. Mukenji wèndè ùvwa mutàmbe bunène bwà kuya mu cilongelu cyà tèòlòjì; yèyè nguvwa ne cyà kuleeja Maasiyà awu—awu. Nè bantu bònsò bàvwa bafwànyine kwikala bàmukòkela *elu* luseke ne *lwàlwa* luseke. Ke Nzambì kumutùmàyè mu cipèèlà, paanyimà pàà lufù lwà tatwèndè, Zekààyì. Ne yèyè ùvwa mwakwidi, kàdì kààkalondakù njila wa tatwèndè to.

<sup>94</sup> Bwalu, bapròfetà kabàtu bàpàtukila mu bintu byà mùshindù bu awu nànkù to. Bàdì bàfùmina mu malaba makàyàbale, mu cipèèlà. Muntu nànsha umwe kì mmùmànyè ne mbafùmine penyì to, anyi mmùshindù kaayi ùdìbo bàjuuka mu cyalu, anyi nì mbwèpì bwà ku maalu àbò malonda nànsha. Bàdì ànu bàpàtuka ne bàyiisha Dìyì, ne Nzambì ùbùumusha, nènku’s kì bôbò bàyaaya bàba. ùpìisha lukongo alu, ne ùtùngunuka mu Dìyì Dyèndè, mwindile ditùkù dinène.

<sup>95</sup> Èkèleeziyà kààkamwitabuuja to, bwalu kàvwa mumanyike kùdìbo to. Kabàvwa ne mulubù wà dijidiibwa dyèndè mu mudimu wà bwambi mu mikàndà yàbò to, kì bwà cinyì bààkamubènga. Nwamònu’s, bôbò kabàvwa bìitabuuja Dìyì dishindika dyà Nzambì to, bitòòke tòò, dileetà ne dileetà. Nwamònu anyi? Maalàkì 3, Mifùndu yìbìdì bwà kumushindika, Maalàkì 3 ne Yeshààyì 40.3. Nwamònu’s, Mifùndu yònsò yìbìdì ayi mmyàmbè bwà muntu uvwa ulwa, ulongolola njila wa Mukalenge. Yèyè wàkakùmbànangana ne dishindika disunguluke dyònsò dyà cyòci aci.

<sup>96</sup> Bivwa bikèngela kwikalayè mupròfetà. “Nènnutùminè Elishà.” Kàdi’s ki yéyè awu mwaba awu, mu mùshindù wònsò mukàyàbàle. Mònaayi mùshindù mwinè ùvwà ngiikàdìlù wendè munwàngàne pyòpyopyò ne wa Eliyà. Eliyà ùvwà muntu wa mu cipèèlà, ke mùvwà Yone; bantu bàà mu cisuku. Yéyè kàvwa muntu wa maalu manèfùke to, ùvwà muntu mukàyàbàle.

<sup>97</sup> Mònaayi kàbidì ne, Eliyà ùvwà mukinyi wa bânà bakàjì, wàkambila Yezàbèlè pa bivwà bitàngilà bilaabu byèndè byònsò, ne mwaba ùvwàye ùkafika ne ùkashìkidila. Ke mùvwà kàbidì Yone. Yezàbèlè wàkateeta bwà kushipa Eliyà, wàkadìcipa ku nzambi yèndè bwà ne yéyè ùvwà ànu mwà kumutùula mutù. Ke mwàkenzà pèndè Heloodiyà. Nwamònu anyi?

<sup>98</sup> Tàngilàayi ànu diyiiisha dyàbò misangu yònsò, tàngilàayi cyàkenzàbo. Mpindyewu tudi tujandula ne bu bòbò mwà kwikala batàngila paanyimà ne kumòna civwà Bible mwámbe, ne batàngile ngiikàdìlù wa muntu awu ne mùvwàye mupwàngàne mu cikondo ne Mifùndu ne bikwàbò byònsò, nùnkù’s bàvwa ne cyà kwikala bamanyè ne ùvwà n’yéyè. Bantu batwè ku bàsambòmbò mbàvwa bacimanyè. Ncyà bushùwà. Bàvwa bajingùlùle kabàvwa bapite pa bàsambòmbò to. Bàvwa bàya kaMutèeleja, kàdi kabàvwa bàCiitabuujà to. Nwamònu anyi? Bwà cinyi? Kabàvwa biitabuujà dikùmbànangana dyà cipròfetà mu díbà dyàbò to.

<sup>99</sup> Mònaayi ne, bàkamuseka, bàmbiikila ne: “mukoleshi wa maalu mwedi wa mbilà, wa mu cisuku, cinyonga cyà kaciyi cilongè kàlaasà to, nè ‘hit, hain’t, tote, carry, fetch,’ ne bikwàbò.” Bu pa ciibidilu bàdi bàmulumbulwishila ku dilonga dyèndè dyà tulaasà. Bàdi bàmulumbulwishila ku mwakulu wèndè, ku mùshindù wùvwàye muvwàle awu. Ùvwà ne cipesa cyà cisèbà cyà nyama cidijingila pambidi, ne mukàbà wà cisèbà cyà kaameelù mudiswika, ùvwà ne myòsà mubidi mujimà. Ùpàtukila mu màyi; kàyi ne èkèleeziyà nànsha umwe, kàyi cibàsà nànsha cimwè, kàyi ne dyelangana dyà dibòkò nànsha dimwè; kabàvwa mwà kuciitaba nànsha; bàvwa munkaci mwà kukuukwila nzambi wa pa buloba. Nwamònu anyi?

<sup>100</sup> Ncyèna ne meeji à kwamba nè mpindyewu kakwènà bapròfetà bàà mashimi bàdi bàpàtuka, bu mùdì Yambèlè ne Yanè to. Kàdi mùshindù wùdì muswè kwenza, nkukenketa mukenji wa ku cibangidilu ku Díyi, díbà adi udi naawù; ùdi ùsanganyibwa mu cikondo kaayi, ne cidì cyamba mu cipròfetà cyà cikondo aci.

<sup>101</sup> Pashiishe cipròfetà cyà Yone cyàkashindikiibwa mu bulongame bwà Nzambi Yéyè mwinè. Tàngilàayi nùmonè mùdìci cipwàngàne. Bible mmwámbe ne: “Díyi dyà Mukalenge dítu dilwa kùdì mupròfetà.” Ne Yesù ùvwà Díyi. Ne Yone ùvwà munkaci mwà kwamba cipròfetà cyà dilwa dyà Díyi bwà dyula; nènku Yesù, Díyi adi, wàkalwa kùdì mupròfetà, mu màyi. Kaa,

bilenga byà dikèma's wè! Mùshindù mwinè ùdidi kadìyi mwà kapangila's wè. . . Nwamònu anyi? Dìyi òvwa cintu civwà kaciyi cìmwèka to mu ditùkù adi. Ki mupròfetà ulwàlwa ewu, wàmba ne: "Mémè ndi dīyī dyà mukana dyà Dīyī."

Bôbò kwamba ne: "Tudi ne cyà kwenza cinyi?"

<sup>102</sup> Yèyè kwamba ne: "Ncyèna mukùmbànyine kusùlulula nshinga yà bisàbaatà Byèndè to. Kàdi kùdi Kampànda mwimàne munkaci mwenù emu, mwaba kampànda, Yèyè ngwìkala Ewu wanùbàtiiza ne Nyumà Mwimpè ne Kapyà awu. Cipèèpudi Cyèndè cidi mu cyanza Cyèndè, ne Yèyè neàkezulè cishiipwidi Cyèndè cyònsò nkòong, ne newoshè bisòta ne kapyà kàdìbo kabàyi mwà kujìmakù to, ùya ne lutete mu diyeebà." Kaa, mupròfetà kaayipu's wè! Yesù wàkamba ne kacya kakùvwakù muntu nànsha umwe mulela kùdi mukàji munène bu yèyè to, too ne ku ditùkù adi. Kaa, mùshindù mwinè wùdibi bitùntumuna's wè! Mùshindù mwinè wàkamanyàye mwaba wùvwàye mwimànyine's wè! Ùvwa mumanyè ànu menemene. Wàkumvwa kùdi Nzambì, ne civwa cikùmbànàngàne ànu menemene ne Dīyī, pa nàнку kàakacyùka civwà bantu bàmba to. WàkaCiyiisha ne kuCyàmba mu cipròfetà, mu mīshindù yònsò. Nènku tàngilàayi, pàdi muntu wùtwa Bulelèlà nyama ku mikòlò, dībà adi Nzambì mmwenzèjībwe bwà kushindikila muntu awu Bulelèlà.

<sup>103</sup> Pàakapwekà Mòsa mu Èjjiipitù mwàmwa, ne kwambayè ne: "Mvwa mu cipèèlà mwàmwa, ne mémè kumòna mucì mukwàte mudilu, kàdi kawùyi ùbùtuka to. Mémè kuya ku mucì aku, nè, pàngàakayàku, kùvwa Dikunji dinène dyà Kapyà dilembèlèle kuntwaku. Ke Dīyī kwamba ne: 'NDI EWU ÙNDÌ.' Ne Yèyè kungambila bwà kwangata dikombo edi ne kupweka mùnwemu ne kwenza bishimà ebi, ne Nzambì neàshindikè Dīyī Dyèndè." Kwololayè dikombo dyèndè, kwàkapàtuka nkùpà ne njiiji, ne mīdimà ne bikwàbò. Ne pashìshe bwà kushindikika mupròfetà awu, Yèyè kwaluja beena kwitabuuja abu buludi ku mukùnà, ki Nzambì kutuuluka mu Dikunji dyà Kapyà dimwèdimwè adi, pa mukùnà ùmwèumwè awu, ne kujaadika nè aci ncyà bushùwà.

Mpindyewu tàngilàayi nùmonè cidìYe mwenze mu ditùkù edi. Menemene.

<sup>104</sup> Mpindyewu, Dīyī òvwa dilwa kùdi mupròfetà ne dimushindikika ne yèyè ke muntu mulelèlà awu, muntu mwena diinà uvwa Mifundu myàmbè ne neikalè awu. Lùkàsàlùkàsà mpindyewu. Kàdi, cyàkàbìdì, Yesù wàkalwa mu mmwènekèlu mushiilàngàne ne dyumvwija dyàbò dikwàtakaja dyà meeji à bantu dyà cipròfetà adi. Muntu ùvwa muumvwije civwàci cifwànyine kwikala. Cyà bushùwà. Ba-Presbytériens bàdi bèèla meeji ne civwà ne cyà kwikala bôbò. Tàngilàayi nùmonè pàdi Nzambì wènza cintu kampànda, tàngilàayi bulongolodi bukwàbò bwònsò bùdi bujuuka ne cyàbù. Eyo, bitu



misangu yònsò ànu mùshindù awu. Bàdi ne Yambèlè ne Yanè myaba yònsò. Mònaayi ne, bàakamba citùpà cyà Dìyi. Kàdi, bilondeshile Dìyi dyà mupròfetà, Dileeta dyònsò!

<sup>105</sup> Mbacipangile cyàkàbìdi, bu pa ciibidilu, baMubiikile ne mmwena lubùkù, “démon; Beelèzèbùlà,” ne kwambabò ne Yèyè mmudyenzè Yèyè Nkàayendè Nzambì, pààbì's bìvwa bikèngela bwà kwikalabò bamanyè, ku Bible wabò mene, ne Yèyè ùvwa Nzambì.

Mònaayi ne, Yèyè wàkambiilwa mu cipròfetà kùdì Yeshàayi, mu Yeshàayi 9.6, wàmba ne: “Dìna Dyèndè nedibùkidiibwè ne Nzambì Mukolè, Taatù wa Kashidi.” Kakwàkwikala kàbìdi baataatù paanyimà pàà cyòci aci to, bwalu Yèyè nguvwa Taatù wa kumpàlà ku cibangidilu, Yèyè ke Taatù umwèpelè; kwambayè ne: “Kanùbùkidi muntu kanà yònsò wa pa buloba ebu ne: ‘Taatù,’ kàbìdi to, paanyimà pàà cyòci aci.” “Yèyè ùdi Nzambì wa—wa Bukolè, ne Taatù wa Kashidi, Mubedyanganyi, Mfùmù wa Ditalala.” Cyà bushùwà.

<sup>106</sup> Mpindyewu, bàakaMwenzela cìvwà bapròfetà bònsò batèèla ne bàvwa mwà kwenza aci, ànu mùdìbo bèna mu Cikondo eci mene cyà Laòdikiyà eci, kuMupàtula pambèlù pàà èkèleeziyà. “Mpofo, butaka, kàdi kabàyi bacimanyè to.” Ànu cyàkamba mupròfetà aci, mupròfetà wa Bible awu. Bafofomija kùdì bilèlè byà bantu, mbaMwele pambèlù, Dìyi pambèlù pàà èkèleeziyà yàbò, bu pa ciibidilu, bu mwàkambàbo cipròfetà bwàbò bòbò.

<sup>107</sup> Mònaayi mpindyewu, ne lùkàsàlùkàsà mpindyewu. Eci kacinùpicikù to. Cyena-bwalu ncyòci eci, mùshindù wàkaDìmanyishà Yesù kùdì bayiidi bàbìdi aba ne Yèyè nguvwa Maasiyà wabò's! Mpindyewu, tumaayi mèsù ónsò elu luseke. Nè mu ditùnga mwàmwa, eci kacinùpicikù to mpindyewu. Tudi bateetè bwà kunwàmabila ne Bible n'Dìyi dyà Nzambì, difùnda kùdì Nzambì Yèyè mwinè, ku mishiku yà muntu ne yèyè bu cyamù cyà mudimu. Nzambì ùdi mwà kufùnda, Yèyè mwinè. Nzambì ùdi mwà kwakula, Yèyè mwinè. Nzambì ùdi mwà kwenza cidìye muswè kwenza aci, kàdi Yèyè wàkasungula muntu bwà kucyenzayè bwalu muntu wàkaDifùnda awu ùdi citùpà cyà Nzambì. Pa nàнку, Nzambì ngwàkafùnda Bible. Bantu abu kabàvwa nànsha bamanyè cìvwàbo bàfùnda aci to, mu ngeelèlù wabò bòbò wa meeji wa buntu. Bàvwa mwà kupangakana naaDì, kàdi bàakaDifùnda. Kabàvwa mwà kupanga kuDifùnda to. Bible mmwàmbè ne: “Bantu bàà kale, bu mùvwàbo basàkiibwe kùdì Nyumà Mwìmpè!” Nzambì wàkàkwàta mudimu ne byanza byàbò, kukwàta mudimu ne mèsù àbò mu bikèenà-kumòna. Kabàvwa mwà kwamba cintu nànsha cìmwè cìvwàbo kabàyi batàngile to. Kabàvwakù mwà kwamba cintu nànsha cìmwè to, bwalu Yèyè ùvwa ne bukòntononyi mu kaabujimà bwà ludìmi, ne munu, cidimba cyònsò cyà mubidi aci cìvwa cyùle tètè zubazuba ne Nzambì.

Kabyèna bikèmesha to mùdi Bible mwâmbè ne bàvwa banzambi, bàvwa citùpà cyà Nzambi's! Yèyè ùvwa kaabujimà kàà Nzambi.

108 Mònaayi mùshindù ùvwa Yesù, Dìyì adi, mufikishe bayiidi bàbidi bàvwa ne mwoyi mucibùlùke abu ku dimanya ne Yèyè ùvwa Maasiyà wabò, Maasiyà awu, Dìyì dilaya. Mònaayi cyàkenzàYe, Yèyè wàkatùma ku cipròfetà. Mònaayi ne: “Bakùtākàne, ne lujòòkò bwà kwitabuuja byònsò byàkafundàbo kùdi bapròfetà abi.” Mpindyewu, Yèyè kàākambakù ne: “Èè, ncinyì, cidi èkèleeziyà wàmba pa bwalu abu ncinyì?”

109 KuMulondelabò bwalu abu. Bàvwa bamanyè maalu à mikùkùku ònsò àvwa menzèke awu. Bàvwa babungàme bònsò. Bàākabanga kuMwambila ne: “Wèwè udi ànu mwenyi munwemu emu anyi, anyi Kwèna mumanyè cidi cyenzeke mu Yelusàlemà?”

110 Wākamba ne: “Bintu kaayi abi?” Byènzè bu ne kàvwa mumanyè to. Nwamònu's, Yèyè ùtu wènza bintu kampànda ànu bwà kumòna ciwènza pa bwalu abu. Nwamònu anyi? Wākamba ne: “Bintu kaayi abi? Yèyè ùvwa nganyì awu? Ncinyì cidi cyenzeke?”

111 “Wèwè udi ànu mwenyi anyi?” Nènku bàvwa bàākula ànu ne Muntu uvwabo basòmbè nendè munda mwà bidimu bisàtù ne citùpà awu, kàdi kabàyi baMumanyè to.

“Bintu kaayi's? Cidi cyenzeke ncinyi's?”

112 “Èè,” mwākambàbo, “Yesù wa mu Nazalèetà, uvwa Mupròfetà awu. Kakùyì mpatà to mu meeji ètù. Ùvwa ne bukolè mu Dìyì ne mu byenzi kumpalà kwà bantu bònsò. Tudi baMumòne wènza bintu bìvwaYe mumanyishiiawe ne m'Mupròfetà wa Nzambi bwà cikondo eci. Tudi bamanyè nànkù. Ne tuywa biitabùùje ne Yèyè ùvwa mwà kwikala Mupikudi, ne Ùvwa mwà kupikula Izalèèlà.”

113 Pashiishe Yèyè kukudimuka e kwamba ne: “Nwènu bakùtākàne, ne bàà myoyi yà lujòòkò bwà kwitabuuja ne byònsò bìvwa bapròfetà bàmbè bwà bwalu Bwèndè ne kabivwa mwà kwenzeka anyi?” Nwamònu anyi? Mutàngilaayi mpindyewu mùdiYe wàlukila ku cipròfetà. Ndidyùla kaayi adi bwà beena kwitabuuja, bàvwa bàmba mùvwàbo baMwitàbuuje's!

114 Mònaayi mwākabùndulàYe cyena-bwalu aci. Yèyè kàākapatukakù buludi e kwamba ne: “Mémè ndi Maasiyà wenù to.” Yèyè's ùvwa mwà kwikala mucyènzè, bwalu ke civwàYe. Kàdi mònaayi ne Yèyè wàkaDimanyisha mu Dìyì, díbà adi bàvwa mwà kumanya. Bu Yèyè mucyàmbè, Ùvwa mwà kwikala mucyàmbè ne kacivwa cifwànyine kwikala mùshindù awu to; kàdi pàākayàYe ne kutwàdija kwakula pa byònsò bìvwa bapròfetà baakùle bwà bwalu Bwèndè, ne bàākacimòna, díbà adi bàvwa mwà kumanya bóbò biinè ne, bu bóbò biikàle bàna bàà Nzambi. Kàdi kukòkaYe ntèmà yàbò ku civwà bapròfetà badyànjlile kwamba ne bambè bwà kukeba mu cikondo civwà Maasiyà, cikondo Cyèndè, ne cyà kumwèneshiibwa. Yèyè,

bu Yone, wàkalekela Dìyi, Bible, bìmanyisha Mukenji wàbò. Mupròfetà mulelèlè kanà yònsò ewu's mmufwànyine kucyènza. Èyowà. Kí mmupàtùke wàmba ne: “Mémè ki Yèyè awu to. Ndi . . .” Awu kí mmupròfetà mulelèlè wa Nzambì to. Nwamònu anyi? Kàdi Yèyè wàkamba ne: “Alùkilaayi mu Mifùndu.” Nwamònu's, Yèyè kàtukù ùpangila mùshindù Wèndè wà dicyènza to. Nwamònu anyi?

Yèyè kwamba ne: “Tudi bamanyè Mòsà.”

115 Yèyè kwamba ne: “Bu nwènù bamanyè Mòsà, nuwua bafwànyine kuMmanya Mémè.” Yèyè kwamba ne: “Mòsà wàkafùnda bwànyì Mémè.” Yèyè kwamba ne: “Kenkètaayi Mifùndu, mu Yòyi amu mmunùdì nwela meeji ne nudi ne Mwoyi wà Cyendèlèlè, ne Mufùndu ngudi ufila bujaadiki bwànyì Mémè. Ndaayi nùkatàngile mu Mifùndu nùcimònè.”

116 Apa Yèyè kènakù ùshintulula mùshindù Wèndè wà dicyènza to, kacya kàtukù mwànji kushintulula to. Yèyè kèna mwà kushintulukakù to, bwalu Yèyè ke Nzambì udi kàyì ùshintuluka awu. Nwamònu anyi? Mònaayi Yèyè kwalukila buludi kùdì bayiidi bàbìdì aba, Kelèòpà ne mulundà wèndè, mu njila wa ku Èmawùsè, ne kwambayè ne, kubàtèlèlè Yè Mifùndu, wàmba ne: “Bwà cinyì nudi bakùtākāne nùnkù bwà kubènga kwitabuuja ne Dìyi dyònsò dìdì bapròfetà bafùnde dītàngila Maasiyà divwa ne cyà kuujiibwa?” Kaa, ditùkù kaayipu's wè!

117 Yone wàkenza cintu cimwècimwè aci. “Kenkètaayi Mifùndu, tàngilàayi paanyimà, mmwàmbè ne nekwikalè 'dìyi dyà ewu udi wela lubilà mu cipèlè.' Ndi mufume penyì?” Nwamònu anyi? Mbwena kwamba ne, abi bìvwa ne cyà kwikala bibàtòokèshileci. Cyà bushùwà's!

118 Bìvwa ne cyà kucitòokèsha leelù ewu, cintu citùdì tumòna Nyumà Mwimpè wènza aci. Wàkamba musangu kampànda ne: “Kenkètaayi Mifùndu.” Nènku tudi . . . Yèyè mmuswè bwà twètù kucyènza leelù ewu.

119 Mònaayi ne, Yèyè wàkabanga ne cipròfetà cyà Mòsà, mùdì Bible mwàmbè, “Yèyè, kubangila ku Mòsà ne bapròfetà bònsò,” kàdi Wàkabanga ne Mòsà. “Mupròfetà,” mwàkamba Mòsà ne, “Mukalenge Nzambì webè neàjuulè munkaci mwènù, munkaci mwà cisàmbà. Mukalenge Nzambì neàjuulè Mupròfetà.”

120 Mpindyewu Yèyè ùvwa mufwànyine kwikala mwàmbè ne: “Kelèòpà, ne mulundà webè ewu, Mòsà kàkambakù ne mu matùkù aa Mukalenge Nzambì ùvwa mwà kùjuula Mupròfetà kampànda anyi? Kàdi Muntu mwinè uvwabò bapoopèle pa nkùrusè ewu, Yèyè ùvwa mukùmbànàngāne ne ngiikādilù uvwa ukèngediibwa awu anyi? Mpindyewu, Mòsà wàkamba cipròfetà eci. Nènku mpindyewu kanùtukù bānji kupeta mupròfetà to kùkaadi nkāmà ne nkāmà yà bidimu, kàdi s'ki Muntu ewu mujùùke apa. Kàdi nganyì uvwa mudyànjididi wa mwinè Muntu ewu, munwàmbi's?” Nwacyùmvù anyi? Nè bapròfetà

bònsò kwambabò bwà bwalu Bwèndè, bwà cikondo Cyèndè, Yèyè kubàmbila. Ncyà bushùwà ne bivwa bifwànyine kwikala bisànkisha bwà kuMutèèleja. Kanùvwaku mwà kuswà bwà kuMutèèleja anyi? Mvwa mufwànyine kuswà bwà kuMutèèleja, bwà kuMutèèleja, cyàkambàYe ne baprófetà bàakamba bwèndè Yèyè mwine, kàdi Yèyè kàakambaku ne ùvwa n'Yèyè to. Wàkabàleeja ànu ku ciprófetà cyanààna. Wàkamba ànu ne: “Muprófetà wàkamba ne bwalu ebu nebwikalè mwà kwenzeka.” Nwamònu anyi?

<sup>121</sup> Twánjàayi kwalukila paanyimà ndambù wa tusunsa, nènku mpindyewu tùtèèlejàayi Méyi matèèdiibwe kùdi Yèyè mwine. Tàngilàayi kunweku, Dìyi Dyòdi diine diikàle ditèèlela Dìyi dyà Yèyè mwine. Dìyi Dyòdi diine diikàle ditèèla Dìyi dyà Yèyè mwine. Kàyi ùbàmbila ne Yèyè nguvwa cyòci aci to, kàdi ùlekela Dìyi didyàkwila ànu Dyòdi diine, díbà adi bwà kumanyabò ne Yèyè ùvwa Nganyi. Dileetà dyà Dìyi, munkaci mwà kutèèla Dìyi mu. . . Dìyi mu mubidi, munkaci mwà kutèèla Dìyi dyà dileetà, diikàle difwànyikijùbwe mu kaabujimà ne Yèyè mwine. Tàngilàayi kùnweku, mpindyewu tuMutèèlejaayi mùdiye ùtèèla amu. Mmunyi. . . Mpindyewu, tudi bamanyè ne bàvwa bònsò babàlondele mu cikòsò maalù àvwa menzèke paanyimà, mbwena kwamba ne, bwà dipoopediibwa dyà pa nkùrusè ne bwà bwalu-bulonda bwà dibùkà dyà ku lufù, lukità, mutwáfumu ku dibala emu. Mpindyewu Yèyè ùdi ùya buludi ku Dìyi dyà ciprófetà civwà cimutàngila Yèyè mwine. Mpindyewu twánjàayibi kwela meeji ne Yèyè wàkamba nùnkù; Wàkamba byàbùngi bipite ebi, kàdi tàngilàayi.

<sup>122</sup> TùMwambàayi ne. . . tuMutèèlèjè wàmba ne: “Bulùlaayi mu Zekàayi 1.12. Nènku Maasiyà kàvwaku ne cyà kusùmbishiibwa, bilondèshile muprófetà, ku bìnjànjà byà mfranga makumi àsàtù anyi? S'nwafùmu ku dyamba ne Muntu ewu wàkasumbishiibwa ku bìnjànjà byà mfranga makumi àsàtù. Bulùlaayi. . .” Nudi nwangata Mifundu ayi anyi? Zekàayi 11.12. Ki pashùshe Yèyè kwamba ne: “Nuvwakù bamòne cyàkambà Davidi mu Misambu, Musambu wa 41.9 anyi? BàakaMutungila kùdi balundà Bèndè. Ne pashùshe kàbìdi, mu Zekàayi 13.7, Yèyè wàkalekediibwa kùdi bayiidi Bèndè. Nè mu Misambu 35.11, mufùnda kùdi bantèmù bàà mashimi. S'nwafùmu ku dyamba ne ke civwàYe. Yeshàayi 53.7, Yèyè ùvwa kamàmà kumpàlà kwà bamufùndi Bèndè. Yeshàayi 50.6 bàakaMutuuta nsòkoci, mwàkambà muprófetà. Misambu 22, bivwa bikèngela Yèyè kwela mbilà pa nkùrusè ne: ‘Nzambì Wanyi, Nzambì Wanyi, WàNdekèdi bwà cinyi?’ Yèyè wàkenza aci, dyàbwàbwa mu mapingaja anyi? Misambu 22 kàbìdi, 18, bivwàlù Byèndè byàkaabanyibwa munkaci mwàbò. Bààkenza nànkù anyi? Ne Misambu 22.7 too ne ku 8, ùvwa musekiibwe kùdi beena lukunà Bèndè, èkèleeziyà. Misambu 22 cyàkàbìdi, kakùvwa mufùbà nànsha ùmwèpelè mu mubidi Wèndè ùvwa

ne cyà kucibudiibwa to, kàdi ‘bàakatùbula byanza Byànyi ne makàsà Àanyi,’” mwàkambàYe. Mukwàte byanza Byèndè paanyimà Pèndè, kakùyì mpatà to, piine apu. “Yeshààyi 53.12 mmwambè ne Yèyè neáfwe pankaci pàà benzàvi. Yeshààyi 53.9 mmwambè ne Yèyè wàkajiikiibwa pàmwè ne babanji. Misambu 16.10 mmwàmbè ne: ‘Ncyakulekela musùukà Wèndè mu ifèrnò to, anyi ncyàkwitaba bwà Wa Cijila Wanyi àmonè dibola nànsha.’ Nènku kî m’Maalàki 3 uvwa mudyànjididi wa Muntu ewu anyi?” Kaa, mvwa muswè kwikala muMuumvwe ùtèèla cyòci aci. Tàngilàayi bipròfetà! Mònaayi nè, díbà adi bifwànyikijilu byònsò bidìYe mufwànyine kwikala mupicilemù, pa bidì bitàngilà Izàkà, mu Genèsè 22, mùshindù ùvwà Nzambi mudyànjile kuleeja Izàkà mu mundidimbi, mùshindù ùvwà taatù Abraham mwangàte mwanèndè sungasunga wa balùme, mwambùle nkùnyi pa kakùnà nè kulàmbulayè mwanèndè umwèpele mulela.

<sup>123</sup> Cyàkabanga mpindyewu kutùkina munda mwàbò. Ùkaavwa mumanè kubàmbila ne bàvwa bakùtākàne bwà kubèngà kutàngila cipròfetà cyà ditùkù adi. Nènku mpindyewu cyàkabanga kubàtùkina, kubangabò kumòna dyula dyà byònsò bìvwà byenzèke mu matùkù makesè à ndekeelu ebi, mu bidimu bìbìdi anyi bìsàtù bishààle ebi, cipròfetà cishindikìibwe cyà cikondo eci. Pa díbà adi ke pààkamanyàbo ne Mulundà wabò mupoopela pa nkùrusè awu, Yesù, wàkuuja Dìyi ne Dìyi dyònsò dyà cyòci eci. Kaa, mpa díbà adi pààkamanyàbo ne Muntu awu ke uvwa bulelèlè Maasiyà awu, bwalu—bwalu Yèyè ùvwa nè cyà kubiika ku bafwè. “Lukità kalùvwakù mwà kuMulama to. ‘Ncyàkwitaba bwà Wa Cijila Wanyi àmonè dibola nànsha.’ Kakwènakù Dìyi nànsha dimwè dyà cipròfetà didìku mwà kupangila nànsha. Ne Yèyè wàkabiika ku lufù.”

<sup>124</sup> “Pashiishe baamisànjeelà abu ku lukità mu dindà emu bàvwa babingè. Yèyè mmubiike ku bafwè. Yèyè ùdi ne mwoyi. Yèyè ke Maasiyà awu.” Bwà cinyi? Kanùcipangidikù to. “Cyenzedi Cyèndè, mudimu Wèndè wà bwambi ne byònsò bidìYe mwenzè mbishindikìibwe ànu menemene Méyi àkambà mupròfetà ne neenzekè bwà ditùkù edi awu. Ke àdi macyenzè.” Díbà adi bààkamanya ne ùvwa n’Yèyè, Mulundà wabò wàkapoopediibwa pa nkùrusè awu, Yesù, uvwa mucyenzè awu. Kabyèna bikèmesha to pàvwà myoyi yàbò yilákuka kapyà munda mwàbò pàvwàYe wàkula naabò apu. Mpindyewu bàvwa bendè kilòmèètà citèemà ne citùpà, ne bìvwà bimwèka bu cikondo cikesè.

<sup>125</sup> Kàdi cikwàbò cintu civwàbo benzè ncyòci eci, nudi bamanyè’s, bàkaavwa búmvwè diyiiisha dyà mèbà àsambòmbò pa cipròfetà ciikàle cishindikìibwe. Ki civwàYe wàkula naabo mu njila ncyòci aci. Mbenzè ànu bàbanga kupweka ne njila, Yèyè kupàtuka kuya, bwalu Yèyè ùvwa ànu ku Yèlusàlèmà aku mene. Mèbà àsambòmbò pashiishe-e...pashiishe, kilòmèètà

dikumi ne yibidi, bàvwa ànu bènda bàpweka ne njila ntàntà wa kilòmèetà citèemà ne citùpà ne ku Emmaus. Kí cyòci aci. Ne Yèyè ùkaavwa muyiishe, mushindike cipròfetà munda mwà mèbà àsambòmbò. Kanùmpiishi mémè pa àànyì àsàtù awu to, díbà adi, nwamònu's. Nwamònu anyì? Kàdi mònayì nè, bóbò bàkaavwa bayiishe. . . Yèyè. . . Bàkaavwa búmvwe diyishi dyà mèbà àsambòmbò pa cipròfetà ciikàle cishindikiiibwe, cishindika.

<sup>126</sup> Mpindyewu díbà díkaavwa diya ditàngìle ku íbaamulòòlò. Nudi bamanyè's, Yèyè ùdi umweumwe awu makèèlèlè, leelù, too ne kashidi. Pa díbà adi ke pàakakàngulàYe mèsù àbò bwà kumanyabò ne Ebèlù 13.8, Yèyè ùdi umweumwe awu makèèlèlè, leelù, too ne kashidi. Ku íbaamulòòlò, maalù à mikùkùkù mmatòòkeshiibwe kùdi cipròfetà. Cìdi munkaci mwà kwenzeka mu díbà dyà cyena-leelù edi aci cidi mwà kumanyishiibwa ànu bipeepèle bu wèwè mwà kwitabuuja ànu cipròfetà cyà díbà edi.

<sup>127</sup> “Èyowà, bakùtākàne, beena lujòòkò ku dyumvwa, beena lujòòkò ku diitabuuja (ucidi ànu ne ulwàngànàpù ne meeji), bwà kwitabuuja ne byònsò byākamba bapròfetà bwà Maasiyà abi, kabivwa bifwànyine kwikala ne cyà kwenzeka anyì?” Mpindyewu Yèyè wàkakenketa tunungu twònsò etu paanyimà ne kuleeja cívwa mupròfetà mwàmbè ne necyènzekè aci. Pashiishe kubangabò kuumvwa. Ki Yèyè kwamba. . . kwenza bu Uvwa ne cyà kutungunuka ne njila. Bàvwa banange Muntu ewu. Kwambabò ne: “Wèwè, Wèwè udi mutùpèeshe cintu kampànda. Kacya katùtukù beelè meeji awu to. Yèyè ùdi ne mwoyi mwaba kampànda.” Bàvwa bàākula Nendè, kabàyi bacimanyè to. Pa nànkù Yèyè. . . ne kakùyi mpatà to Yèyè wàkabàtàngila ne dibungama dyònsò, ke kutwàdijaYe kubàshiya, kàdi Yèyè—Yèyè ùvwa mwindile bwà bóbò kuMubiikilabò. Ke cidiYe mwindile dilòòlò edi, bwà wèwè kuMubiikila.

<sup>128</sup> Mònayì ne, pàākaMubiikila bayiidi abu bwà kubwelayè mu bwobùmwe bwàbò banyungùlùkile mèesà, mpa díbà adi ki pàākenzàYe cintu kampànda ànu mwàkenzàYe kumpàlà kwà dipoopediibwa Dyèndè dyà pa nkùrusè adi, ne mèsù àbò àkatàbala. Bàvwa bamanyè byenzedi Byèndè, ngenzèlù Wendè wa maalù. Bàvwa bamanyè cyàkenzàYe, ne Yèyè wàkacyènzà musangu awu ànu mwàkenzàYe kumpàla amu. Ki bóbò kwamba ne: “N'Yèyè awu's!” Ki bóbò kajuuka nè lùbilu lwònsò bwà kucyèlela mbilà mikolè, ki Yèyè kujìmina. Ne mwaba wàkangatabo mèbà àsambòmbò bwà kuteejeja diyishi edi, pàmwàpa mu tusunsa makumi àbidi bàvwa bambùlùle makàsà bwà kwalukila bwà kukalondela beena dyàbù bakwàbò ne: “Mmubiike ku lufù cyà bulelèlè. Ùdi ne mwoyi cyà bulelèlè.”

<sup>129</sup> Balundà bàànyì, eci ki dyula dyà Maalàkì 4, Luukà Munsantu 17, Yone Munsantu 15, kaa, yàbùngì menemene, Bwàkabuulwibwà 10, bipròfetà byàbùngì bidì mwà kuleejiibwa ànu menemene ne mbyà ditukù edi. Ne mu Mukànda wà Maako

ne mu Maataàyi kàbìdì, mwaba wùdiYe mwambè ne bimanyinu binène ebi ne maalu à kukèma bivwa mwà kumwènèka mu dyulu, ne bantu bàdi bàtùbùikila ne ntuumàlòngò, tuumàlòngò tùdì túbùùka atu, tùdì mwà—mwà kujìmina ne bukòlè ne lùkàsà lwà dyeji, meeji àdì mwà kubwela. Yèyè ùdì mwà kufùnda, Ùdì mwà kwakula, Ùdì mwà kwenza cyònsò cidìYe muswè kwenza aci. Dikunji dinène dyà Kapyà, “umweumwe awu makèèlèlè, leelu, too ne kashidi.” Ne tulòndù tùdì tұлwa pa buloba, bipaapu byà musàkà byà mwìshì bibànda mu lupeepèlè, bipita pa mwaba ùdì citaleela anyì ní ncinyì kabiyì mwà kusanganyibwa nànsha, mu butùmbùke bwà kilòmèètà makumi ànaayi ne mwandamukùlù. Bidyànjlila kwamba cidimu cijimà ne citùpà kumpàla kwà kwenzekaci, ne nebiikalè mùshindù awu. Pashìishe kukùdimuna fòtò ne kumòna ne Nganyì udi mutàngile panshì awu. Kacya Dìyi nànsha òmwè dikaadiku dyambùbwe kaditukù dipangile to, kàdì’s ke Dìyi difùnda dyà Nzambì ndyòdì edi, dishindika ne didi Bulelèlè. Nènku ncikondo cyà dilòòlò cyàkàbìdì. Ndi ndìkonka ní Ùvwakù mwà kwalukila, ku ngàsà, dilòòlò edi ne kwenza cintu kampànda mpindyewu mwàkenzàYe kale wàwa amu. Tùsambilàayi tùMulòmbè. Myandà yà mikùkùkù mitòokèsha kùdì cipròfetà cishindika.

<sup>130</sup> Nzambì wa Bukòlè bwònsò, tùkwàcishèku. Tùkwàcishèku, Nzambì munanga, bwà kuumvwa, bwà kuumvwa bintu bivwà bikèngelà twètù kumanya, kuumvwa Dìyi Dyèbè. Nènku mpindyewu, Mukalenge, tudi bùmvwè mayiisha kùkaadi mpindyewu bidimu bitwè ku binunu bibìdì, difùnda dyà mikànda. Nènku mu matùkù à ndekeelu emu ncyàlùkile kàbìdì cyànyimà, ne mpindyewu ncitàngile ku cikondo cyà dilòòlò. Ba-Méthodistes, ba-Baptistes, ba-Presbytériens, ne bààbùngì bàà kùdìbo munda mwà cikondo cijimà aci bàkaadi baakùle Neebè, nènku pàmwàpa ànu mu bule bwà njila wa ditùkù dinène edi òmwè kadìyi ní mmuunya ní mbufùkù, mùvwà mupròfetà mwàmbè amu, kàdì ku ibaamulòòlò nekwikalè Bukènkè. Yesù wàkabiika mu lukità ne wàkamwènèkela Simonà ne bakàjì, ne kubàleeja ne Yèyè ùvwa ne mwoyi. Apu tuvwa mu dindà. Nènku mu dilòòlò Yèyè wàkaalukila cyàkàbìdì. Kàdì Yèyè wàkaya kùdìbo mundaamuunya, ùbàtànðisha bwà bufofo bwàbò, kàdì pashìishe Yèyè kuDimanyisha kudibò ku dìbà dyà dilòòlò.

<sup>131</sup> Nzambì, bwelàku mu bwobùmwè bwètù dilòòlò edi butùdì naabù mu nyùngulukilu wa Dìyi. Nzambì, mbìtábùùjìbwe ne lutàtu lwàbùngì leelù ewu munkaci mwà bantu, kàdì ndi ne kusàkidila bwà ne kùdì bàmwè baùdì Wèwè mubiikile ne mubàlongòlwèle Mwoyi wà Cyendèlèlè, ne Wèwè wàkamba ne: “Bònsò bàdi Taatù muMpèeshe nebàlwe.” Nènku mpindyewu pàdì Makènkè à dilòòlò àteema apa, paùdì Wèwè mwanyishe apa, Mukalenge, bwà ne cipròfetà nànsha cimwè (pa nkàmà yà bìdì bipàtùke) kacitukù kacya cipangile musangu nànsha ùmwè to.

Dìbà adi mu bulelèlè cyôci cidileeja nàнку, cidi ne cyà kwikala Wèwè, bwalu muntu nànsha umwe kí mmufwànyine kwikala ne ndudi nàнку to. Ànu mùdi Bible, muntu nànsha umwe kàvwakù mwà kufùnda, muntu nànsha umwe mu cipòòlò cyà bidimu cinunu ne nkàmà yisambòmbò, kùdi bafùndi makumi ànaayi bashiilàngàne, mwà kufùnda, ne kamùyì ntùpàkànyì nànsha mikesè mu Dyôdi to.

Nzambì munanga, ndi ndòmba bwà Wèwè kuDìmwènesha dilòòlò edi, wa mu Ebèlù 13.8, bwà ne Wèwè udi umweumwe awu makèèlèlè, leelù, too ne kashidi. Ne byenzedi biWàkenzà musangu awu abi, Udi ubyènga leelù ewu. Ne Wèwè wàkalaya bwalu abu, Wàkamba ne: “Mu matùkù à ndekeelu aa, pàdi buloba búsanganyibwa bu Sodomà ne Gomòlà, ditwìsha dyà maalu katungu.” Tudi tutàngila bânà bàà balùme aba ànu batàmbe kufwànangana nè bânà bàà bakàji, bàvwàla bilàmbà bu bòbò, ne—ne kumòna bânà bàà bakàji bàteeta kwenza maalu bu bânà bàà balùme, ne kumòna bakàji ne balùmè mu cikondo citwìsha katungu eci, tàngilààyì dikòkiibwa dyà kùdi masandi ndishààle lu—lupìngù lwà dikuukwila. Èvànjeeliyò mmusàkiibwè pambèlu ku luseke lùmwè, ne butakà bubwèlè mu èkèleeziyà wa Laòdikiyà. Éyì Nzambì, ndìbà kaayi’s wè! Lwàku, Mukalenge Yesù, ùDìmanyishèku kutùdi. Bwalu tudi tulòmba nùнку mu Dìnà dyà Yesù.

<sup>132</sup> Mpindyewu panùcidi ne mitù yènu miinyika apu, mèsù ènù mabwita, nènnùlòmbèku cintu kampànda. Nudi nwtabuuja ne Nzambì udi kaaba aka anyi? Nudi nwtabuuja ne bintu bìdiCi munkaci mwà kwenza leelù ewu ebi mbipròfètà byùle anyi? Nudi nwtabuuja ne Yesù Kìlistò ùdi umweumwe awu makèèlèlè, leelù, too ne kashidi anyi? Nudi nwtabuuja ne pàvwàYe pànwàpa ne mmumwènèshìibwe mu mubidi bwà ditùkù adi apu, ne byenzedi byàkenzàYe mwaba awu abi, bìvwà ne cyà kwenzeka cyàkàbìdi mu ditùkù edi anyi? Mupròfètà ngudi mwàmbè nàнку. Bible ngudi mwàmbè nàнку. Mufundu wònsò ùdi ne cyà kuula, kawèna mwà kupangilakù to. Yèyè wàkaDìmanyisha bìshi? Ku diikala Mupròfètà uvwa Mòsà mwàmbè awu. Mumanyè mìnsokòntù yà mu myoyi yà bantu. Mukàji kampànda wàkalenga civwàlù Cyèndè, Yèyè kukùdimuka e kwamba ne: “Diitabuuja dyèbè dyàkusùngìdi.” Pàakafikà Simonà Peetèlò kùdiYe, Wàkamanya dìnà dyèndè, kumwambila ne yèyè ùvwà nganyì, ne tatwèndè ùvwà nganyì. Ne Yesù umweumwe mulenga awu kí mmufwè to, Yèyè ùdi ne mwoyi bwà kashidi ne kashidi. Butùmbi bwìkalè kùdi Nzambì’s wè! Nènku ndi ngiitabuuja ne, mu dìbà dyà dilòòlò edi mpindyewu, Yèyè mmutùbìikile bònsò pàmwè cyàkàbìdi.

<sup>133</sup> Éyì Mukalenge Yesù, lwàkù munkaci mwètù. Kùtùpìcìkù to. Lwàkù ùsombè neetù too ne mwàcyà bufùkù, pashiishe ùlekelè tuye Neebè màalabà; bwà twàmòna mwà kuKumanya mu bukolè bwà dibìikà Dyèbè dyà ku lufù, bwà dinanga ne ngàsà Webè



ne luse biikalèku neetù. Éyì Nzambì wa Cyendèlèèlè, enzàku bintu ebi. Tudi bamanýe ne ànu Nzambì nkààýendè ngudi mwà kubifila.

<sup>134</sup> Mu díbà dyà mikùkùkù edi, swákù twambè eci. Nzambì, Taatù wetù, mubidi wètù n'tabernacle mukwàte ne byà luse bwèbè Wèwè. Kàdi, Mukalenge, lekèlè ngàsà Webè mujididi, Nyumà Mwímpè Webè awu, àlwe mpindyewu. Tùkezùlekù ku mpatà yònsò ne dilubakana dyònsò, dibandangana dyònsò ne mulongo wònsò wà mpatà wùdi mufwànyine kwikala munda mwètù awu, bwà twamòna mwà kwikala badishikàmìne kakùyì mpatà nànsha mikesè to; tupàtuka, tutonda ne dikima dyònsò bu Peetèlò ne: “Wèwè udi Kilstò, umweumwe awu makèlèlè, leelù, too ne kashidi.”

<sup>135</sup> Tudi twitabuuja ne Díyì Dyèbè dìdi Bulelèlè, Mukalenge. Twánjì tùmònààýibi ànu cyanààna, kumpàla kwà twètù kubanga mulongo wa babèèdi ewu, Mukalenge, uDimanyisheku kutùdi. Bu muWàkamba ne: “Ànu mwàkadibi mu matùkù à Lotà,” pàvwà Abraham, kasùmbù kabìikìdìibwe bwà kupàtuka kindìle mwànà mulaya, Lotà úvwa kuntwaku úmvwa Billy Graham wa cyena leelù ne Oral Roberts kùdì bulongolodi bwà dngumba abu kwìnshì kwàka, bu ditùnga. Kàdi Abraham úvwa muntu muzònzàme kàyi ne bulongolodi nànsha bùmwè to, ànu kasùmbù kakesè aka kènda kàlalakana pa buloba bùvwàye ne cyà kupyàna abu. “Ne bapòle nebàpyanè buloba.” Dìngà ditùkù, mwinshì mwà mucì wà dilèjì, pàvwàbo basòmbe apu, munkaci mwà kwikisha, Nzambì kupwekaYè mu mmwènekèlu wa Muntu. Banjèlò bàbìdì kupwekabò mu Sodomà. Nènku Nzambì, mu mubidi wà buntu, wàkajaadika ne ki civwàYe, Yèye kwamba ne: “Abraham, mukajèèbè Sarah, ùdi penyì?” Matùkù makesè kumpàlè kwà cyòci aci, yèye úvwa Abram; ne S-a-r-r-a, Sarra; kí n'Sarah to, “mwànà wa bakàjì wa mfùmù.” Nènku Wèwè kumubiikidila ku dínà dyèndè dyà bu mwànà wa bakàjì wa mfùmù, mwànà wa bakàjì wa mfùmù. Wèwè wàkabiikila Abraham mu dínà dyèndè, Abraham, taatù wa matùnga. Ki Wèwè kwamba ne: “Nènkumwènekèlè.”

<sup>136</sup> Nzambì, mùshindù mwinè úvwà mwoyi wà mupròfeta awu ne cyà kwikala mutùpìke's wè! Yèye kumanya ne Wèwè uvwa Nganyì díbà adì's. Kabyèna bikèmesha to pààkakoweshàye màyi ku makàsà, kutwàlayè byàkudyà byònsò bìvwàye naabì, ne biinè abi byà bitámbe bwímpè, e kubitéeka kumpàlè Kwèbè. Úvwa mumanyè ne úvwa n'Nzambì mwaba awu. Pashiishe kwambaYè ne: “Sarah udi penyì?” byenze bu ne Yèye kàvwa mumanyè to. Ne Wèwè. . .

<sup>137</sup> Abraham kuMwambila ne: “Ùdi mu ntentà. . . ùdi mu ntentà, paanyimà Pèèbè apu.”

<sup>138</sup> Ne Wèwè wàkamba civwà ne cyà kwenzeka aci. Ne yèye, munda mwà mwoyi wèndè, kuCyèlayè mpatà. Ki pashiishe

Wèwè—Wèwè kwambila Abraham ne: “Sarah wèdi aci mpatà bwà cinyi, wàmba munda mwà mwoyi wèndè ne: ‘Bintu ebi kabyèna mwà kwenzekakù to?’ Kùdikù cintu kampànda cìdi citàmbe kukolela Nzambi anyi?”

<sup>139</sup> Éyi Nzambi! Yesù, Nzambi mumwènèshìibwe wa Dìyì, Wèwè kwamba ne: “Ànu mwàkadìbi mu matùkù à Sodomà,” buloba nebwikalè mu ngiikàdilù awu pabwìpì menemene ne kabùtù kàà bàà Bisàmbà byà bendè, cipungu cyà bàà Bisàmbà byà bendè. S’ke twètù aba, beena Sodomà too ne ku mwoyi wà munda! Ne pashiishe Wèwè wákamba ne Mwànà wa muntu, utu misangu yònsò ùbadiibwa bu “mupròfetà,” neàbuuludiibwè mu dìbà adi. Kumbajaku Mèyi Èbè, Éyi Nzambi. Twètù, bàna Bèèbè bàdi bìitabuuja abu, tudi bindìle ne myoyi yà meeji matòoke, bwà kutùpèèsha diitabuuja, Mukalenge, bwà ne, patwènzà mulongo wà babèèdì, bantu nebiitabuuje. Tudi ku ibaamulòòlò, Taatù. Makènkè à dilòòlò à Mwànà wa Nzambi (Ewu Wakadikù, ne Udikù Awu, ne Wàlwa Awu) àDimwèneshè ku cipròfetà cìdiYe mwenze. Mu Dìnà dyà Yesù Kilistò. Amen.

<sup>140</sup> Ndi mpindyewu mudilongolole bwà—bwà kusambidila babèèdì. Kàdi ncintu cyà pabwàci, mutùdi biimàne kaaba aka. Ki mémè ewu mwimàne mwab’ewu ngèèla kadyòmbò kùdi bantu, ne bàdi bàtùlondela ku nshinga mu ditunga dijimà, bwà ne Nzambi ùcìdi ànu Nzambi. Yèyè kèna mwà kupangilakù to. Ne cìdiYe ùlaya aci, ki cyènzàYe. Yèyè kààdyàkupangilakù kucyènza to, bwalu Yèyè mmulayè bwà kucyènza. Ki bwà cinyi ndi mwà kutèeka dyeyemena dyà kakùyì tuseku to mu cìdiYe mwàmbè. Ki bwà cinyi ndi mwindile Dilwa Dyèndè, ndi mwindile bwà Yèyè kumwènèka dìbà kanà dyònsò, bwalu Yèyè wákamba ne: “Mu dìbà dinùdi kanùyì nwela meeji to,” bàà pa buloba kabàyi bèèla meeji to, “dìbà adi Yèyè neàmwènèkè.”

<sup>141</sup> Mpindyewu, bwà ku dyànyì pàànyì dimanya. . . Ndi mu tabernacle wanyì emu, ne kùdi ndambù wa bantu basòmbe kaaba aka bândi—bândi mumanyè bimpè. Mwanèètù Wright, bakesè bàà ku bàdi basòmbe mwab’ewu aba, ànu mwab’ewu, bândi mumanyè bulelèlè. Kàdi kùdi bààbúngì bèènù bândi nciyì mumanyè to. Nènku ncyèna ne mùshindù wà kwamba ne Nzambi neènzè cyòci eci dilòòlò edi to. Tudi baMumòne ùcyènza munda mwà bidimu byàbúngì bishààle ebi, kàdi Ùdi mwà kubènga kucyènza dilòòlò edi. Ncyèna mumanyè to. Aci’s ncimutàngile Yèyè. Yèyè mmudishikàmìne. Yèyè ùtu wènzà cìdiYe muswè kwenza aci. Muntu nànsha umwe kèna mwà kuMwambila cyà dyenza to. Yèyè mmudisòmbèlè nkààyèndè, mu diswa Dyèndè ne njila Yèndè. Kàdi bwalu Yèyè ngudi mucilayè, ndi mMulòmba bwà kucyènza. Kacyì bwà bwalu bwètù twètù to, bwà ne tudi naaci dijinga, kàdi pàmwàpa bwà bwalu bwà beenyi kampànda, bwà Nyumà Mwimpè wàmòna mwà kulaaba. . . mpindyewu dilaabiibwa pambidi pèètù. Mpindyewu, nànsha Yèyè mundàbè bishi, bikèngela ànùlaabè, pèènù, cyà bushùwà menemene, bwà

kwitabuuja.

<sup>142</sup> Mpindyewu ndi muswè kwenza mulongo wà babèèdi, ne ndi muswè kusambidila babèèdi ne mwànyì mwónsò. Mpindyewu, tudi nànsha mwà kwenza mulongo, kubìkila bantu ne kubàbàndisha kùnweku, mulongo wa babèèdi ne kusambidila bantu bónsò kaaba aka bàdi bàsaamà, mündi ncinka, kufikisha bambi naanyì bwà kulwabò neetù mwab'ewu, ne kunùtentekela byanza. Tudi mwà kucyènza ànu bushùwà. Anyì tudi mwà kulòmba Taatù wetù, Yèyè Umwèpelè udi mufwànyine kunwènzela cintu kampànda, bwalu byanza byànyì bìdi ànu muntu bu wènu bantu. Kàdi bwalu bùdiku mbwà ne, kí cyanza cyà muntu cidi cicyènza to; n'Diyì dyà Nzambi. Diitabuuja mu Diyì adi ke didì dicyènza. Kakwèna cintu cyà maalu à mamanya nànsha cimwè pa bwalu abu to, cidi ànu cyònsò kaciyì cyà maalu à mamanya to.

<sup>143</sup> Kakwènakù cintu nànsha cimwè cidi mwena Kilistò naaci mu byà mvità byèndè abi cyà maalu à mamanya to. Nuvwakù bamanyè nànkù anyì? Dinanga, disànka, ditalala, mwoyi mule, bwìmpè, bupòle, musànggeelu, lutùùlù, diitabuuja, Nyumà Mwìmpè, byònsò mbyà kabiyì bimwènèka kùdi maalu à mamanya to. Nènkù's ki cintu cimwèpelè cidi cilelèlè ne cyà ndekeelu ncyòci aci. Cyònsò cyùdi utàngila cidi cìfùmina ku buloba ne cyàlukila ku buloba. Kàdi bintu byùdi kùyikù mwà kumòna ne dísù dyèbè abi to, kàdi ùBimòna bìDileeja, ki buloba bwà Cyendèlèlè mbwòbù abu.

<sup>144</sup> Udikù mufwànyine kwitabuuja, bu Nzambi mwà kuDimwènèsha ne kuleeja ne Yèyè udi mwaba ewu ne mwoyi, wènza bintu bimwèbimwè byàkenzàYe ku cibangidilu abi, paanyimà pàà Mukenji ewu, udikù mwà kuciitaba bu dyondopiibwa dyèbè anyì? Nzambi àcìfilèku. Mpindyewu ndi ndòmba muntu kanà yònsò mu nzùbu emu, nànsha wèwè mwikàle nganyì anyì kùdi mufùmìne ní mpenyì, ndi nkulòmba wèwè ànu bwà kwitabuuja kakùyì tuseku to ne Mukenji ewu m'Bulelèlè. Ke Mukenji ùdi Nzambi naawù mu Bible Wendè bwà dìbà edi, dyà ne Yesù Kilistò ùdi kaaba aka dilòòlò edi ne ùdi ne mwoyi. Mpindyewu menemene ne . . .

<sup>145</sup> Nwènu bónsò nudi bammanyè mèmè, ndi mwaba ewu mene mu cimenga emu mùmvwà mukolèle. Ncyèna nànsha nè kàlaasà kalonga kàà kashàadile aka to. Aci's ncilelèlè menemene. Ne nwènu nukàadi bammanyè kùkaadi ntàntà bule bukùmbàne, ndi ntèkemena nè ndi nè mwoyi kumpàlà kwènu nwènu bwà kunùleeja nè ndi wa kweyemena nè wa meeji matòòke. Mèmè ncyèna mwena lubombo to. Nànsha badyudi bàànyì kabàtu bàmba nànkù to. Bòbò, bàdi bàmba ànu nè: “Kwèna—kwèna mwena lubombo to, kàdi udi wèwè ànu mu ntùpàkànyì. Udi ànu mupile mu dipanga kabiyì ku budìswile to.” Ncyèna ngèèla meeji ne ndi mutùpàkàne mu dipanga to, bwalu Diyì dyà Nzambi didi difila bujaadiki bwà Mukenji wànyì, ne Ndifwànyine

kukwambila ne Dyôdi didi Nganyî. Kàbìdì nudi bangûmwè ngàmbe patòoke nè Kí mmémè to, pa nàнку Dìdì nè cyà kwikala Yéyè. Mmwômò anyi? Ikàlà nè diitabuuja kùdì Nzambì pa díbà adi. Tàngilà mu nùнку ewu, nènku udi witabuuja Nzambì. Bu wèwè mwà kwitabuuja Nzambì, Nzambì neàkupèèshèci. Bu Yéyè mwà kwenza nàнку mwàkenzàYe kumpàla amu, díbà adi Yéyè ùcìdì ànu Nzambì. Nudi nwitabuuja nàнку anyi?

146 Udi ucìitabuuja anyi? Inǎbǎnzà kampànda mmusòmbe kaaba aka kumpàlà kwànyì, muntàngìle, ne binsònji mu mèsù, ne meeji matòoke wònsò. Ncyèna mumanyè ne yéyè n'nganyî to, ncítukù mwànji kumumòna to. Ndi mwenyi kùdì. Udi wela meeji ne Nzambì mmumanyè mùnsokòntù wà mu mwoyi wèbè, majinga ebe, anyi mpèkaatù webè, anyi ní ncinyi cyònsò? Udi wela meeji ne Yéyè mmumanyè anyi? Udi wela meeji ne Yéyè ùvwa mwà kumbulwila cidì mpèkaatù webè, cyùdì mwenzè, cyùvwà kùyì ne cyà kwikala mwenzè, anyi dijinga dyèbè, cyònsò cidìku aci anyi? Bu Yéyè mwà kucyènza, ncifwànyine kukufikisha ku diMwitabuuja, kumanya ne cidì ne cyà kwikala Yéyè anyi? Udikù mufwànyine kwitaba ne n'Yéyè anyi? Kí mmpèkaatù webè udi ukutàcisha to; ukàadi mumutonde. Kàdi udi ujinga dibàtiiza dyà Nyumà Mwímpè. NeùMupetè. NgǎMumònu ùpweka ùpicila kùdìye aku's.

147 Bwà nwènù kumanya ne mvwa munkacì mwà kutàngila kùdì mukàji awu, yéyè ùvwa muntàngìle, ndi muswè nnùleejè Nyumà Mwímpè. Tàngilàayi kùnweku, ànu lwà kumutù kwà mukàji mutekète udi musòmbe apa ewu, kwìnshi kwà makàsà àànyì eku. Pangǎmbì nàнку awu apu, ke cintu cìmwècìmwè aci cidìye ùjinga, ndibàtiiza dyà Nyumà Mwímpè. Udi witabuuja ne neùMupet'anyi, mwanèétù wa bakàji? Ela cyanza muulu, díbà adi. Kacya ncítukù mwànji kumòna mukàji awu kacya bándela to, ku dyànyì dimanya.

148 Mònaayi muntu mulùme udi musòmbe apa ne mutù wèndè mwinyika ewu, udi musòmbe mwaba awu mene, ne nshìngù wa muteelu wende kàyì mumukùmbàne, ne bikwàbò. Udi usaama disaamà dyà kalòndò kàà mènnyì. Udi witabuuja nè Nzambì neàkusàngàje anyi? Elà cyanza cyèbè muulu bu wèwè mwà kuCìitaba. Èyo, Nzambì àkupèèshèku dilòmbà dyèbè.

149 Nsongàalùmè wa citende udi musòmbe apa ewu, ùdì ùkèba dibàtiiza dyà Nyumà Mwímpè. Udi witabuuja ne Nzambì neàkupèèshèYì anyi; mukalenge, wèwè udi ne kàlavwandà katòoke kaaluja paanyimà awu? Nzambì neàcyenzè.

150 Muntu mulùme udi apa ewu ùdì ùsambidila mukàjèndè. Ùdì mu lùpitaadi kampànda. Udi witabuuja ne Nzambì neàmwendòpè anyi, neàmusàngàje anyi? Udi ucìitabuuja anyi? Udi mwà kucìpeta.

151 Ne cyanza cyèbè cyela muulu citèèka ku muminu wèbè, udi witabuuja ne Nzambì ùdì mwà kwondopa disaamà dyà mwoyi

didi dikutàcisha adi, disaamà dyà cifu dyûdi naadi adi anyi? Udi musòmbe mwaba awu, usaama mpindyewu mene. Ncyà bushùwà anyi? Udi witabuuja ne Yêyè ùdi ùkwondopa anyi? Dìbà adi udi mwà kucipeta. Amen.

<sup>152</sup> Nudi numòna ne Yêyè ùdi umweumwe awu makèlèlè, leelù, too ne kashidi. Konka bantu abu, ùmòne ní ndi mubàmanyè. Ncyèna mubàmanyè to, kàdi Yêyè ngudi mubàmanyè. Amen. Mònaayi Bukènkè abu ku luseke lwà cimanu kwàka, bulembelèle kumutù kwà muntu kampànda udi musòmbe mwaba awu. Ùdi ùsaama disaamà dyà matètè à mwongo. Kí ngwà muneemu to, ngwà ku Géorgie. Mukalenge Duncan, itàbùùjà ne mwoyi wèbè mujimà, Nzambi newòndopè disaamà dyà nyimà adi. Udi witabuuja ne mwoyi wèbè wònsò anyi? Nzambi àkubènèshè.

<sup>153</sup> Muntu mulùme nyêyè ewu musòmbe lwà paanyimà apa, ne disaamà dyà nyimà, muntàngile. Ncyèna mumumanyè to, kàdi m'Mukalenge Thompson. Udi witabuuja anyi? Juukilà kuulu, mukalenge, paanyimà apu, bwà nè. . . ndi mwenyi kùdi. Ncyà bushùwà. Kàdi wèwè udi musòmbe mwaba awu, usambila. Disaamà dyèbè dyà nyimà adi dyondwòpìbù mpindyewu. Yesù Kilistò ùdi ùkusàngaja.

<sup>154</sup> “Nekwikalè Bukènkè ànu lwà ku ibaamulòòlò.” Kanwènaayikù numòna? Yêyè ùdi kaaba aka dilòòlò edi anyi! Yêyè's ke NDI munène awu. Yêyè ùdi umweumwe awu makèlèlè, leelù, too ne kashidi. Nudi nuciitabuuja anyi? Wèwè udikù musànkishùbwe ne mutwishùbwe ne ewu n'Yesù Kilistò ùDìmanyisha, ùDìmanyishila mu cipròfetà anyi?

<sup>155</sup> Kùditàcishi bwà dísù to. Nzambi ùtu wòndopa babèèdi ne beena ntàtu.

<sup>156</sup> Mbantu búngì kaayi bàdi. . . Mbanganyi mwab'ewu, bàdi bàsaama? Tùmonèbi byanza byènu. Bìdi bìmwèka ànu bu ne kùdi dikòkiibwa ne diditàcisha. Kùdikù bàdi ne twartà twà disambila munkaci mwènù anyi? Ncyèna mumanyè ne ndi mufwànyine kunùfikisha too ne apa bishi to. Ndi muswè kunùsambidila, kàdi ncyèna mumanyè mwà kucyènza to. Nudi numòna cidi, tàngilàayi ku cimanu, mùshindù kaayi ùngiikalà mwà kubàbwejamù? Kàdi ambà tǔng bu nwènù babùlàkàje kajila kàmwè? Biikàle ne kakwabò kajika ànu mwaba awu, muntu yònsò kacya wìmana tèndee.

<sup>157</sup> Teèlejàayi, ntèlèjàayi. Kacya nkàatukù munwàmbile cintu kampànda mu Dìna dyà Mukalenge cìtù kaciyi cyenzèke anyi? Ncyà bushùwà anyi? Bintu byònsò bitu misangu yònsò ànu bimpè. Kacya ncitukù mwànji kunùlòmba dyeyà nànsha dimwè mu nsòmbelu wanyi to, mmwòmò anyi? Musangu nànsha ùmwè. Ncìtukù mwànji kwangata mulàmbù mu nsòmbelu wanyi to. Ncyèna mwaba ewu bwà mfrangà to. Ncyèna mwaba ewu bwà kunùseeswisha to. Ndi mwaba ewu mbwà kumwènesha Dìyi dyà Nzambi dyà dìbà edi. Ngánwàmbidì Bulelèlè, ne Nzambi

wáfidi bujaadiki ne m'Bulelèlà. Mpindyewu ndi nkwàmbila ne, EMU MMÜDÌ MIFÜNDU YÀMBA, ne mwena kwitabuuja yéyè ànu mutentèkèle mubèèdi byanza, Yesù wàkamba ne: “Nebàsangalè!” Nudi nwitabuuja nànkù anyi? Dìbà adi, mu Bwikadi bwà Nzambi, kanwènaayikù nwitabuuja ne Yéyè neàcyènzè mpindyewu mene anyi?

<sup>158</sup> Mpindyewu tentèkèlàngànaayi byanza muntu ne mukwèndè, nènku shààlaayi ànu babilamè mwaba awu bwà katanci kakesè. Mpindyewu, kanù—kanùsambidi to, tentèkèlàngànaayi ànu byanza muntu ne mukwèndè; nwènù bàdi pambèlu pàapa mu ditùnga abu. Nènku mèmè, mèmè mwinè, ndi ndààdila mèmè mwinè pa mishwàlà eyi. Mpindyewu ndi muswè bwà nwènù kutàngila kúndi ànu mu kasunsa kàmwè cyanaàna. Ncinyi cidi Nzambi mushiye kaciyi cyenza? Tàngilàayi mùdiYe, cidi Dìyi ditùdi babalè, bipròfetà bitùdi bambe, bwà ne Yesù mmudimwènèshe Yéyè mwinè ku bipròfetà. Mpindyewu tàngilàayi dìbà, ne mbingu yisàtù yà ndekeelu eyi mutùdi batèèke dìbà ditùdi ne mwoyi edi. Tàngilàayi citùdi babalè, mùshindù ùdi bapròfetà bàà mashimi ne bimanyinu bìdi bifwanyine kuseeswisha basungula. Mùshindù mwinè ùdi Dìyi dimwènèshìbwe's, mùshindù ùdi nzambi wa cikondo eci mufofomije mashimi. . . myoyi yà bantu. Ne mùshindù mwinè ùdi Nzambi Yéyè mwinè mwàmbè ku bipròfetà Byèndè ne bintu ebi nebyènzekè mu Cikondo eci cyà Laòdikiyà. Kakwèna cintu nànsha cimwè cidi cishàale kaciyi cyenza nànsha. Nzambi ùdi kaaba aka ànu Nzambi umweumwe uvwa wakula ne bantu bàvwa batàngile ku Èmawùsè abu, wàkadimanyisha Yéyè mwinè ku bipròfetà bivwà bidyànjila kwamba Bwèndè awu, Yéyè ùdi kaaba aka dilòlò edi ùmanyisha Bwikadi Bwèndè ku bipròfetà bidyànjila kwamba bwà cikondo eci. Yéyè ùdi umweumwe awu makèlèlèlè, leelù, too ne kashidi. Nudi mwà kuciitabuuja anyi? Dìbà adi tentèkèlàngànaayi byanza muntu ne mukwèndè. Kudisambididi wèwè mwinè to, kàdi mu mùshindù wèbè wèwè mwinè sambidilà muntu ùdi mutentèkèle byanza awu, bwalu ùdi munkaci mwà kukusambidila. Mpindyewu tàngilàayi, kanwèdi mpatà to.

<sup>159</sup> Nènku mpindyewu bu nwènù mwà kumòna cìndi munkaci mwà kutàngila eci's! Nènku nwènù's nudi bamanyè ne ncìvwa mufwanyine kunùshima to, mwimàne kaaba aka. Bu nwènù mwà kumòna, nènku diitabuuja dyèbè divwa mwà kukòka Nyumà Mwîmpè munène wakendela mu lupeepèlè—lupeepèlè awu, uvwà maalu à mamanya makwàte fòtò awu, kàdi mònaayi mùdiYe ùtambàkana mu nzùbu emu ùteeta ànu bwà kupeta mwaba kampànda bwà—bwà kwikila, ùteeta bwà kupeta kaaba kàà dyelela lwongò. Mwítàbùùjè wèwè ànu cyanaàna, mwanèètù wa balùme. Yéyè mmucimanyishile ku Mifündu ne bikwàbò, bwà ne ncyà bushùwà. Mpindyewu sambilà ne meeji matòoke bwà muntu ùdi mutentèkèle byanza awu; ùdi ùkusambidila.

<sup>160</sup> Yesù wa mu Nazalèeta munanga, mòna's, tudi bamanyè, Mukalenge, ku Díyì ne, Wèwè udi kaaba aka, ku mlayì ne Wèwè udi kaaba aka: “Mwaba wònsò wùdi bàbìdì anyì bàsàtù badìsangìshe mu Dìna Dyànyì, Mémè ndi munkaci mwàbò amu. Ne bimanyinu ebi nebifilè bàdì biitabuuja; bóbò batentèkèle babèèdì byanza, babèèdì nebàsàngalè.” Mu mavwala à ku tèlefonè ewu, swàkù bwà Nyumà Mwìmpè munène àbwelè mu disangisha ne disangisha dyònsò. Swàkù bwà Bukènkè bwà Cijila bùmwebùmwe butùdi batàngile ànu mwab'ewu mu èkèleeziyà emu, swàkù bwà Bùpwekelè umwe ne umwe yònsò, nènku swàkù bwà bwòndopiibwè pa díbà edi. Tudi tutàndisha mwena lukunà, dyabùlù, mu Bwikadi bwà Kilistò; tudi twambila mwena lukunà, ne yèyè mmucimùnyìbwe kùdì bì—bisaamà bitùmvwila, lufù lwà Mukalenge Yesù ne dibìikà dyà ku lufù dyà bucìmunyi mu ditùkù diisàtù; ne cileejì Cyèndè cijaadikìibwe cyà ne Yèyè ùdi kaaba aka munkaci mwètù dilòlò edi, mwikàle ne mwoyi, paanyimà pàà bidimu cinunu ne nkàmà citèemà. Nyumà wa Nzambì udi ne mwoyi ùjèku mwoyi wònsò ne diitabuuja ne bukolè, ne bukolè bwà dyondopa bwà ku dibìikà dyà ku lufù dyà Yesù Kilistò, Udi mufwànyikijìibwe mpindyewu kùdì Bukènkè bunène ebu bùdì bunyùngùlùkile èkèleeziyà, mu Bwikadi Bwèndè. Mu Dìna dyà Yesù Kilistò, enzàku nàнку bwà butùmbì bwà Nzambì.

<sup>161</sup> Swàkù bwà mishwàlà yitùdì tusambidila eyi, swàkù bwà yìkafike kùdì babèèdì ne beena ntàtù bàdìbo bàyitwàdila abu. Swàkù bwà Nyumà Mwìmpè umweumwe udi kaaba aka mpindyewu munkaci mwà kudimanyisha Yèyè mwinè awu, àdimanyìshe Yèyè mwinè pa mubèèdì yònsò udibò bayitèntèkèla awu. Swàkù bwà Bwikadi bwà Nzambì bùtambèku kuuja mwoyi wàbò ne diitabuuja mu mùshindù wà ne bubèèdì bwà mubidi wàbò bwòndopiibwè. Tudi tulòmba nùнку, bwà butùmbì bwà Nzambì, mu Bwikadi bwà Yesù Kilistò ne mu Dìna dyà Yesù Kilistò, patùdì twètù basadidi bàà Yesù Kilistò tulòmba nùнку apa. Amen.

<sup>162</sup> Mpindyewu munda mwà myoyi yènù, nànsha cìvwà cìkutàcìsha ciikàle cinyì, wèwè udikù, byùmukila munda munda mwà mwoyi wèbè amu, mwà kwitabuuja ne mwoyi wèbè wònsò ne Díyì dyà Nzambì dyàkupèèshi dilòmba dyèbè anyi? Ndi ngiitabuuja ne cyanza cyònsò, cìmvwà mwà kumòna, cìvwà cyela muulu. Wèwè mwitabuuje cyòci aci, mpindyewu vùlukà ne, kwàjìkì.

<sup>163</sup> Nwènù bàdì bàtùlondela ku nshinga yà tèlefonè abu, panwikalà biitàbùùje ne mwoyi wènù wònsò, pàdì bambi munkaci mwà kunùtentekela byanza, ne bananga bèènu biikàle munkaci mwà kunùtentekela byanza nwènù biitàbùùje ne mwoyi wènù wònsò ne kwàjìkì, kwàjìkì. Nyumà Mwìmpè munène awu, Udi kaaba aka mu tabernacle emu dilòlò edi. Ndi muMumòne ùtambakana kumutù kwà bantu, ùdìleeja Yèyè

mwinè mwab'ewu ku luseke lwà cimanu, ne kupwekela muntu mulùme kampànda, ùpweka mwab'ewu ne ùbànda ùpicila mu nzùbu emu, wènda ùmanyisha mìnsonkòntù yà mu myoyi, dimanyishiibwa dyà Bwikadi Bwèndè, bwà kuleeja ne Yèyè udi umweumwe awu makèèlèlè, leelù, too ne kashidi. Yèyè ùdi munkaci mwètù! Yèyè ùdi Nzambi, Nzambi utu kacya kàyiku ùpangila awu.

<sup>164</sup> Nè myoyi yètù kayivwakù yilàkuka kapyà munda mwètù, ne kayènakù yilàkuka kapyà mpindyewu anyi, bwà kumanya nè tudi mpindyewu mu Bwikadi bwà Yesù Kilistò mubiike ku lufù, Ewu udi luumù ne butùmbi ne cyà kwikala kùdiye bwà kashidi; Udi mu cimfwànyì pyòpyopyò cyà Yèhowàh wa Bukolè bwònsò awu; Wàkapweka mu mmwènekelu wa Dikunji dyà Kapyà mu kaacipuka kàvwà kàlàkuka kapyà, bwà kukòka ntèmà yà mupròfetà awu; Yèyè wàkapweka pa mukùnà awu, ne ewu yònsò uvwa ulengakù mene awu ùvwa ne cyà kushipiibwa, pa kuumusha Mòsà ne Yoshùwà. Mùshindù mwinè wùvwàbi ne Yèyè wàkalombola bânà bàà Izàlèlèlè mu cipèèlè, mu lwendu lwàbò alu, bu cimfwànyì cyà bantu babiikidiibwe bwà kupàtuka leelù ewu. S'ki Yèyè ewu, ku bukèbikebi bwà maalu à mamanya, muDimanyishe mene kumpàlà kwà maalu à mamanya. Ne ku byenzedi Byèndè mene ne ku cipròfetà Cyèndè mene, bintu bìdì byamba mu cipròfetà bwà Yèyè kwenza mu ditùkù edi ebi, bwà kuMuvwija umweumwe awu makèèlèlè, leelù, too ne kashidi, mmushindikiiibwe ànu menemene. Kabyènakù bikùmbàne bwà kwenza ne myoyi yètù yilàkukè kapyà munda mwètù anyi? Nzambi ànùbènèshè.

<sup>165</sup> Mpindyewu ne dīyì dimwè, tùjuukilàayi kuulu twàmbè ne: “Ndi mpindyewu ngiitaba Yesù Kilistò bu Musungidi ne Mwondopi. Ne ku ngàsà Wendè, kubangila pa dībà edi apa, Éyi Nzambi, kwitabikù bwà bupidyà nànsha bukesè bùbwele munda mwà mwoyi wànyì to, bwalu nkàadikù mumòne cipròfetà cyà ditùkù edi cyùle. Ndi ngiitabuuja ne Yesù Kilistò ùdi ne mwoyi ne ùdi kaaba aka mpindyewu munkaci mwà kushindika Dīyì Dyèndè dyà dībà edi. Bipròfetà byàkafùndiibwà bwà bwalu Bwèndè bikaadi byùle mpindyewu munkaci mwètù. Yèyè ke wanyì Musungidi, Nzambi wanyì, Mfùmù wanyì, byànyì Byònsò-m-byònsò.”

<sup>166</sup> Nzambi munanga, tèelejaku bujaadiki bwètù. Nè tùpèeshèku, ku ditùkù ne ku ditùkù, Dyàmpà dyà Mwoyi. Nènku tudi tuKulàmbula butùmbi, Éyi Nzambi, byùmukila mu ndòndò wa mwoyi wètù. Tudi tuKutùmbisha, Wèwà wa Bukolè awu, Nzambi wa bapròfetà awu. Mu Dīnà dyà Yesù Kilistò. Amen.

Kaa, cikondo kaayipu's wè, cikondo kaayipu's wè!

. . . itàbùùjà nàka;  
Itàbùùjà nàka, itàbùùjà nàka,



Bintu byònsò bìdi mwà kwenzeka, itàbùùjà  
nàka.

Tùwimbàayi mùshindù ewu.

Mpindyewu ndi ngiitabuuja, kaa, mpindyewu  
ndi ngiitabuuja,  
Bintu byònsò bìdi mwà kwenzeka, mpindyewu  
ndi ngiitabuuja;  
Mpindyewu ndi ngiitabuuja, kaa, mpindyewu  
ndi ngiitabuuja,  
Bintu byònsò bìdi mwà kwenzeka, mpindyewu  
ndi ngiitabuuja.


Aci mbujaadiki bwèbè anyi? Mpindyewu patùdì twinyika  
mitù yètù apa:

Too ne patwàsangilà! too ne patwàsangilà!  
Too ne patwàsangilà ku makàsà à Yesù;  
Too ne patwàsangilà! too ne patwàsangilà!  
Nzambi ikalè neenù too ne patwàsangilà  
cyàkàbìdì!

[Mwanèètù Branham ùdi wimbila mu matàma *Nzambi Ìkalè  
Neenù—Muf.*] (Udi muswè kwamba cintu kampànda anyi? Vayle.)

. . . ku makàsà à Yesù;  
Too ne patwàsangilà! too ne patwàsangilà!  
Nzambi ikalè neenù too ne patwàsangilà  
cyàkàbìdì!

<sup>167</sup> Ne mitù yètù miinyika, Mwanèètù Vayle mmwimàne kaaba  
aka bwà kutangalaja bantu mu disambila. Mwanèètù Lee  
Vayle, yèyè ke mufundi wa tabernacle ewu, wa byà kubala  
ne mikàndà, ne bikwàbò. Mwanèètù wa mushinga mukolè  
be, yèyè ùdi naanyi mu tumpanyè twàbùngì. Mvwa njinga  
ne ngikalapu ne mpungà wa kulekela mwambi yònsò, bwà  
kubàndayè kuulu eku ne kwakula naabò. Nudi bùmvwè, ndi  
mutwishibwe. Mwambi yònsò, tudi ne disànkà dyà kwikalakù  
neenù kaaba aka. Beena kwitabuuja bònsò, bantu bàà mu  
maèkèleeziyà mashilèshilàngàne, ne bakwàbò kàbìdì, tudi ne  
disànkà dyà kwikalakù neenù kaaba aka. Nènku ncyà bushùwà  
ne ndisambila dyètù bwà muntu ne mukwèndè ne: “Nzambi ikalè  
neenù too ne patwàsangilà cyàkàbìdì.” Ne mitù yètù miinyika,  
ne byanza byètù byela muulu, tùwimbàayi cyàkàbìdì ne kalolo  
kwònsò kùdì Nzambi.

Too ne patwàsangilà! too ne patwàsangilà!  
Too ne patwàsangilà ku makàsà à Yesù!  
Too ne patwàsangilà! too ne patwàsangilà!  
Nzambi ikalè neenù too ne patwàsangilà  
cyàkàbìdì! 

65-0801E Myandà Yà Mikùkùkù Mitòòkesha kùdi Cipròfetà  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)